

東
華
續
錄

臣朱壽朋敬編

臣汪錫增恭校

十二月庚辰朔溥頤爲禮部右侍郎薩廉爲盛京兵部侍郎○以溥頤爲右翼總兵○辛巳害○前楓
霖奏請於南甯地方設立商埠得旨該衙門速議具奏○開復已革記名提督程允和原官賞還頂翎
交宋慶差委○調榮惠爲禮部左侍郎溥頤爲兵部左侍郎○諭近來京城錢鋪倒閉之案層見迭出銀
價日落糧價日長按之街市情形並今歲秋收分數不應至此推原其故必有奸商市僧暗中把持以致
軍民生計日艱尋常數日之需不足餬一日之口倘不嚴申禁令勢將無所底止著步軍統領衙門順天
府五城嚴行曉諭嗣後京城地面開設錢鋪糧店商人均應按照市價公平貿易倘仍藉口現在短絀任
意居奇再有誑騙倒閉擾商糧價情事卽行嚴懲不貸地方居民人等如有藉此聚眾鬧錢鋪致令匪
徒乘機肆搶者卽著一體嚴拿從重究辦以安市面而恤民艱○壬午欽奉 慈禧端佑康頤昭豫莊誠
壽恭欽獻崇熙皇太后懿旨浙江巡撫劉樹堂加恩著在西苑門內乘坐船隻拖牀○乙酉以王福祥爲
大理寺卿○諭前據湖北巡撫曾鈺奏請變通成例當經降旨令該衙門議奏以覘衆論茲據翰林院侍

請學生貽數奏參大臣擅請變法光祿寺少卿張仲忻奏參疆臣莠言亂政各一摺會銖原奏語多紕繆於朝廷整頓庶務力圖自強之本意大相刺謬是爲亂法不得以變法藉口會銖著革職永不敘用以爲莠言亂政者戒原奏著毋庸置議該部知道○丙戌以于蔭霖爲湖北巡撫○調李經羲爲雲南布政使以李興銳爲福建布政使調周蓮爲福建按察使以廷雍爲直隸按察使○加賞資善堂煖廠米石○諭軍機大臣等依克唐阿等奏鵬鵠等翎擬請暫緩捕打一摺據稱金州屬廠現有俄兵往來施放洋鎗鵬鵠遠避以致該兵無從圍捕等語鵬鵠係上用要需除金州外是否尙有打捕之處著依克唐阿等查明具奏將此諭令知之○張汝梅奏山東省清糧項下例有應徵黑豆如遇歉收之年向徵粟米查民間種豆雖於種穀本年各州縣被水被蠲被沙收成減色顆粒細小不堪兌運除被災較重之處另請蠲緩外所有應徵漕豆之齊河濟陽禹城臨邑長清陵縣德州德平原泰安萊蕪肥城東平東阿平陰惠民青城陽信樂陵商河甯陽汶上陽穀茌平鄒城單縣觀城朝城聊城堂邑博平茌平清平莘縣冠縣館陶高唐恩縣濟甯金鄉臨清邱縣夏清武城等四十四縣先後稟報本年豆收歉薄請將應徵黑豆及抵額一五耗豆援案改徵粟米俾小民易於輸將等情由藩司督糧道會詳請奏前來臣覆查無異相應仰懇天恩俯准將齊河等四十四州縣應徵本年黑豆及抵額一五耗豆改徵粟米兌運出自 鴻慈迺格允

之○張汝梅奏山東省額徵漕糧例應徵麥十分之一如遇歉收向准改徵粟米本年各州縣春夏之交雨澤愆期麥收歉薄顆粒未能飽綻不堪兌運若令照常輸將勢須另買好麥完納於民情殊多未便除被災較重之處另請蠲緩外所有應徵漕麥之歷城等五十五州縣先後據稟麥收均止五分及五分餘不等核與改徵粟米成案相符相應仰懇 天恩俯准將歷城等五十五州縣應徵本年漕麥改徵粟米兌運俾小民易於輸將出自 鴻慈逾格允之○諭依克唐阿奏查明防營積弊據實參辦一摺前奉字右軍後營馬隊營官藍翎候補騎尉裕繩於被控詐贓案內要證延不交出著先行革職如查有通同勒詐情事卽歸案審辦右軍右營步隊營官藍翎儘先把總張鳳雲於哨官等刑逼盜犯及攔奪防所等情失於覺察實屬鈐束不嚴著卽行革職奉字右軍右營哨官補用千總馬友賢包庇會局收受月規著卽行革職歸案審訊補用都司黃得勝攔奪防所本干例禁惟逃犯周得勝係由該弁報信拿獲功罪尙足相抵業經摘頂撤差著免其議該將軍仍當破除情面隨時查察如有各項情弊卽行從嚴參辦以肅營伍該部知道○丁亥欽奉 慈禧端佑康頤昭豫莊誠壽恭欽獻崇熙皇太后懿旨有本日召見來京之蒙古王公敏魯布扎布旺喇克帕勒齊棍桑諾爾布察克達爾扎布楊桑多昂東僧格貢桑珠爾默特巴咱爾濟哩第杜英固爲扎布托果瓦那木扎勒色丹均著加恩在西苑門內騎馬並乘坐拖牀○戊子

予捐助東賑官紳顧璜等旌獎○諭軍機大臣等恩澤等奏吉江兩省現因放荒混亂界址一摺據稱江
省今春招放湯汪河等處閒荒乃被吉林三姓咨覆阻止等語吉江兩省本屬一家朝廷原無歧視該將
軍等同屬疆寄於放荒一事自當一氣聯絡和衷商辦著恩澤延茂各按繪圖疆界詳查情形斟酌妥協
奏明辦理○欽奉 慈禧端佑康頤昭豫莊誠壽恭欽獻崇熙皇太后懿旨本日召見來京之蒙古王公
布彥烏勒招依額爾德木畢哩克圖濟克丹達克齊瓦察克都爾色楞貝多桑保阿爾賓巴雅爾那遜綽
克圖勒旺布哩克濟勒車旺哩克靖均著加恩在西苑門內騎馬並乘坐拖牀內扎薩克台吉色凌濟喇
布勒欽圖布齊外扎薩克台吉特木爾車林多爾濟那木凱多爾濟內扎薩克貝子圖們巴雅克什克布
吉木均著加恩賞坐拖牀○己丑胡聘之奏臣於光緒二十四年正月初一日欽奉 寄諭據榮祿奏各
省煤鐵礦產以山西河南四川湖南為最請飭籌款設立製造廠局漸次擴充從速開辦以重軍需著各
就地方情形認真籌辦總期有備無患足以倉猝應變等因欽此當以各省向無機器製造局廠亟應趕
速籌辦飭司派員前赴天津定購製造鎗礮各種機器並酌建房屋僱集工匠以便試行仿造經臣奏奉
硃批該衙門知道在案茲據該委員等勘定省城北關外柏樹園廢廟一所可以建立局廠並買廟外
地基藉資推廣現已購料興工一切廠屋均按洋式修造以期堅固惟事屬創始各省又非通商口岸僱

募工匠採辦料物價值極昂需費甚鉅值此司庫款項萬分支絀實屬無可騰挪查有光緒二十三年臣
奏明派員整頓歸化關稅長收盈餘銀五萬兩係省就地新增之款應請提充工用以濟要需一俟機
器運到廠屋粗具規模即飭督令工匠先行試造以裕軍儲等情由營務處司道轉據機器局委員詳請
具奏前來臣覆查無異理合具陳下部知之○諭張汝梅奏楊史道口進下現已堵築合龍請將出力員
弁擇尤獎勵一摺山東黃河自桑家渡漫口合龍後經該撫飭令總兵崔廷桂道員丁達恩馳赴楊史道
口督率在工員弁併力工作於十二月初一日將正壩金門占盤壓穩固初二日挂纜合龍初四日始得
斷流壩外之水漸次涸復在事員弁自應量予獎勵所有原參之候補知縣吳金龍候補縣丞戴奎先儘
先補用遊擊龔廷魁均著開復革職處分吳金龍並免其送部引見其尤為出力之候補知府朱慶元著
免補本班以道員補用候選同知袁世敦著免補同知以知府分省補用東河候補通判馬春祺著免補
本班以同知直隸州補用候補知縣李猛著俟補缺後免補直隸州以知府分省補用知縣馮祖同候補
知縣任嘉斌均著免補本班以直隸州知州補用並賞加四品銜候補知縣徐湛恩著俟補缺後以直隸
州知州補用試用州同張文采著免補本班以知州補用候補縣丞李沅著免補本班以知縣補用並加
同知銜候補巡檢王大謨著免補本班以府經歷補用東河試用縣丞李期爵著免補本班以知縣補用

分省試用縣丞孫培恩尙錫寬均著免補本班以知縣仍分省補用補用參將楊春和著免補參將以副將儘先補用遊擊吳志宏葉雲升均著免補遊擊以參將儘先補用都司樊景山著免補都司以遊擊儘先補用並加副將銜補用守備張棟臣陳玉崑均著免補守備以都司儘先補用並加遊擊銜千總李步餘著以守備在任候補並加都司銜拔補千總茅檀著免補千總以守備儘先補用把總蔡昌文著免補千總以守備在任候補補用副將降補都司杜榮福著開復降補處分餘著照所議辦理另片奏請將總兵崔廷桂道員丁達意獎勵等語崔廷桂丁達意均著交部從優議敘該部知道○諭前因渦陽縣土匪倡亂迭經諭令劉坤一鄧華熙等會同辦理近聞河南夏邑地方又有匪徒起事深恐連結渦匪分途滋擾惟念近歲豫皖交界地方連年荒歉難保無災民因飢掠食畏官捕治揭竿而起此等愚民於法固無可貸原情究屬可憫若不分良莠一概剿捕致令玉石俱焚殊非朝廷視民如傷之意前因安徽鳳陽等屬迭遭水旱曾經諭令戶部撥款趕辦急賑並令劉坤一鄧華熙查明被災處所妥籌賑撫宵旰焦勞無日不以民生爲念特恐州縣玩視民瘼或匿災不報或散賑不實致令朝廷恩膏不能下逮然此非特地方有司之罪且疆大吏與有責焉劉坤一久任兼圻裕長鄧華熙各膺疆寄均屬盡無旁貸當宣布朝廷德意先行出示解散飭從一面通籌賑款遴派勤明幹練之員會同地方官妥爲撫恤如有不肖州縣虛

應故事或隱匿侵吞卽著從嚴參辦務使災黎早獲一日之生全卽朝廷早釋一日之焦慮至各處教堂林立必須實力保護毋任奸民乘機滋事各路調集勇營尤當嚴申紀律不得妄行殺戮波及無辜其倡亂匪首以及甘心從賊之徒務當會合各營實力兜剿毋得稍留餘孽致釀後患用副朝廷綏靖地方曲示矜全之意○辛卯以成章爲宗人府府丞○欽奉 慈禧端佑康頤昭豫莊誠壽恭欽獻崇熙皇太后懿旨乾清門行走蘇呢特多羅貝勒索特那木多布沁加恩著在西苑門內騎馬並乘坐拖牀乾清門行走喀喇沁輔國公僧格扎布加恩著在西苑門內乘坐拖牀○壬辰諭廖壽豐奏浙江省城火藥局失慎請將管轄各官分別議處一摺候補副將劉道登候補從九嚴嵩蘭疏於防範均著卹行革職候補通判徐光瑩有兼轄之責亦難辭咎著革職留任餘著照所議辦理該部知道○癸巳以賈修綱爲甘肅西甯鎮總兵○諭李鴻章劉坤一張汝梅奏出洋華人報効工賑鉅款懇恩給獎一摺本年山東江蘇地方連被災歉需款浩繁據道員李徵庸等稟據南洋各埠華人李戴清等電稱約集出洋經商華人報効山東江蘇工賑銀各二十萬兩共銀四十萬兩等情李戴清等身在外洋心存鄉國慨捐鉅款實屬深明大義有裨時局著准其按照銀數給獎實官以示優異此外別項賑捐均不得援以爲例該衙門知道○甲午諭軍機大臣等現在京師制錢短少亟應推廣鼓鑄各直省近年多有開局鑄錢之舉著各督撫一律

查明辦理其分兩以每文八分爲準務令銅質精純輪廓完好不得以貽薄模糊之錢攙雜充數各省已
經設局者速卽開爐鼓鑄未經設局者卽行查照舊章一體開辦將所鑄錢樣先行呈覽嗣後鑄造數目
按季奏報以便酌量提解該督撫務當督飭承辦之員認真辦理毋滋流弊○諭著派崑岡馳驛前往
西陵查辦事件隨帶司員著一併馳驛○乙未欽奉 慈禧端佑康頤昭豫莊誠壽恭欽獻崇熙皇太后
懿旨鎮國將軍載瀛之子溥忻著承繼予敕郡王奕譞爲孫加恩賞給固山貝子○世鐸等奏光緒二十
四年十二月初一日軍機大臣面奉 諭旨有人奏地丁漕糧請實徵實解等語各省丁漕錢數折合銀
兩參差不齊自應酌中定價以歸畫一著軍機大臣會同戶部妥議具奏欽此查原奏內稱各省地丁漕
糧向來原有定額惟現時銀價僅抵制錢一千二百文而官吏徵收制錢各地方均按二千數百文共
至三四千取之於民其浮收之數反倍多於正供以閭閻奉公之歛徒供胥吏侵蝕之資積弊相仍牢不
可破似宜 嚴飭各督撫轉飭所屬將一應地丁漕糧均按實徵錢數折合銀兩約提若干以爲地方辦
公而耗羨解費亦另定畫一數目其餘均實徵實解涓滴歸公每年約可增錢漕三分之一等語臣等伏
查例載各省田賦凡地丁耗羨皆以銀數爲定而徵收事例又載應交錢糧願折錢交納者該督撫於開
徵之先按時價合定收大錢若干等因原以民間通用制錢徵收尙少虧耗故例准折錢交納以爲便民

起見第從前銀價甚昂折錢較多而民不爲累今則銀價日賤折錢照舊而民已不堪臣部檢查檔案如江蘇每銀一兩折錢二千五百八十二文山東折京制錢四千八百文至徵收漕糧每石折錢三千四百餘文及三千七百文不等按之時價均屬大相懸殊此外無確數可稽者參以人口每係折錢完納比較時價總不免有浮多且浮多之數互有不同不惟此省與彼省不同且一省之中亦復不盡相同此丁漕錢數折合銀兩各省參差不齊之情形也上年臣部於議還給事中龍鴻書條奏地丁折錢案內奏令各省就本地完納情形暨向來徵收章程酌量議減漕糧折錢亦一律酌減又附片奏准照江西減徵錢文及加解平餘成案令各該省將向來折錢若干此次減徵民間者若干提歸公用者若干分晰奏報本年五月間復於議覆御史徐士佳條陳帶徵學堂經費案內奏明地丁之內帶徵別項款目恐爲百姓之累令各省除照臣部奏案減徵丁漕及提出歸公不計外均按現在銀兩錢數已徵收在官者每銀一兩每米一石各提出制錢五十文以爲學堂經費此又臣部因各省徵收丁漕折錢較多分別減徵提用之辦法也現在復有臣工條奏將地丁漕糧均按實徵錢數折合銀兩均提若干以爲地方辦公奉諭旨飭令酌中定價以歸畫一仰見朝廷取民有制規畫周詳之至意臣等竊維近年銀價日落錢價日漲丁漕折錢在民照常完納在官已多盈餘臣部上年奏案分別減徵提解下以省百姓折徵之累上以應

公家至急之需所謂利國利民而不利中飽者其法蓋不外是乃自奏准通行後各省照辦者江西以外
僅有江蘇安徽浙江河南湖北湖南等省此外並未照辦實屬未能盡一茲既擬令實徵實解涓滴歸公
應由戶部再申明前奏凡未減徵提解各省應仍令就各該州縣折錢盈餘數目詳細覈定減徵民間者
若干提解歸公者若干分晰報部以備查覈撥用不得見好屬員輒以賠累為詞致正供所餘悉歸中飽
聖各省銀錢價值市面間有多差究不致大相懸絕惟丁漕徵錢折合銀數火耗輕重不同運解遠近不
同因之折錢多寡亦各有不同其無名之費用額外之誅求尚不必計今欲酌中定價莫如先令各省概
以時價為衡時價既不相上下而傾鎔火耗解送運腳實在必需者亦明定確數無稍含混此外一切巧
立名目藉端浮收各項概行刪除徵收方為核實應請 旨飭下各省將軍督撫轉飭各屬查照本省銀
錢通行市價參以向辦徵收章程將每地丁一兩每漕米一石按時價應折錢若干以錢合銀無論該省
平色若何均按庫平庫色為斷應需火耗若干再加以運送腳費統計至多不過若干至少不過若干通
盤算明即由各該將軍督撫酌中奏定數目徵收以歸畫一隨具奏以後價值又有漲落仍准隨時奏明
辦理總期實徵實解較若庸一毋任稍有參差 上諭軍機大臣會同戶部遵旨議覆各省丁漕照數折
合銀兩酌中定價一摺各省地丁漕糧向有定額例准折錢交納原為便民起見惟近年銀價日落錢價

日滿在民照常完納在官已多盈餘以致正供所餘悉歸中飽殊非體恤民艱之意著各將軍督撫嚴飭藩司糧道查照各省銀錢通行市價將丁漕銀米按照時價折錢若干以錢合銀均按庫平庫色爲斷每年酌中奏定數目徵收以歸畫一如有不肖州縣巧立名目藉端浮收卽著從嚴參辦將此通諭知之○袁世凱奏練兵以儲糧爲命脈必須預爲購採始免匱乏之虞查近年南省米價日昂銀價陡落採辦兵米尤多以迫於要需易致虧耗如於秋冬間新米登市之初派員隨時收買尙易措手且可稍免虧賠而有備無虞兼可固練兵根本擬懇 天恩飭下戶部撥發米價墊款銀十萬兩計可購米三萬數千石存儲備發除臣軍月餉已領至明年正月外自明年二月起每月在正餉內由戶部扣發銀一萬兩以清墊款在正餉毫無濫支而節費贖軍兩有裨益如蒙 俞允嗣後按每年秋冬間撥案撥支由部依次扣發以資儲備報可○鄧華熙奏 臣准軍機大臣字寄光緒二十四年十月初三日奉 上諭本年安徽鳳陽潁州泗州等屬被災鄧華熙墊撥司庫銀十一萬兩並准開辦賑捐俾作賑撫之需小民諒可不致失所惟念來春青黃不接之時民力未免拮据著傳諭該撫體查情形如有應行接濟之處卽查明於封印前奏到候旨施行等因欽此仰見 聖主軫念民艱有加無已至意跪讀之下欽感莫名遵經恭錄行司確查去後茲據署布政使李廷蕭查明詳覆前來 臣加查核近年安徽省被水受旱各州縣前於成災情

形案內逐一查勘輕重情形請將各該州縣應徵錢漕銀米分別別熟徵收並遞緩爾欠惟鳳陽潁州泗州三府屬上年被災之區積水未全消本年又復被水低窪田禾悉被淹沒秋收失望小民困苦難堪
茲奉 特旨勸辦賑捐並飭司籌定銀款委員會同地方官分別查撫嗣經臣奏奉 諭旨撥給銀八萬兩以爲賑撫之用已委員分途前往會同各該地方官確查戶口量予撫恤兼辦工賑平糶其餘被災較輕地方窮困黎民分飭就地設法安撫倘有外來流民亦經隨時措資分別遣回現在潁江沿淮田畝水漸涸退未被水旱各村堡均已翻犁播種麥祇以自秋徂冬雨澤稀少高岡受旱之區二麥尚未一律播種所幸目前糧價稍減隆冬仍可無虞來春青黃不接之時如察看情形必須接濟當再因地制宜或飭令就地籌捐或酌動公項屆時妥籌辦理總期民咸得所以仰副 聖主子惠元元至意報聞○丁酉文海奏奴才接准班禪額爾德尼咨稱伊外祖父期美汪布蘇蒙 大皇帝鴻恩賞給輔國公職銜尚未身受旋即病故現據伊家主僕會懇請與胞弟扎喜汪結轉請賞給公稱職銜頂翎並稱達賴喇嘛父兄叔姪歷蒙賞給公職銜頂翎班禪額爾德尼與達賴喇嘛均蒙 大皇帝一視同仁擬請照例 賞給深沾 鴻慈等情懇請轉奏前來奴才查光緒十七年經前駐藏辦事大臣升泰以班禪額爾德尼坐床幼而無父彼時胞兄尚未及歲是以請與伊外祖父期美汪布公銜經理藩院核議具奏奉 旨期美汪

布著加恩賞給輔國公職銜欽此欽遵在案此次班禪額爾德尼因伊外祖父期美汪布雖蒙 天恩未獲身受請 賞給伊胞弟公爾職銜頂翎核與達賴喇嘛父兄叔姪蒙賞公爾頂翎之例相符可否仰邀

天恩將班禪額爾德尼之胞弟 恩汪結 賞給公爾職銜頂戴花翎之處出自逾格 鴻慈允之○

諭御史余誠格奏練兵宜求實際請飭額爾親校閱一摺現正時事方殷各省防營練軍必須認真整頓方足備緩急之用若徒委諸營員循例操演任聽將弁敷衍具文何以振興武備著各省督撫嚴飭各營按期操演躬親校閱並飭省外各營不時抽調會操力除老弱充數之弊如有冒糧缺額沾染軍營惡習者立予參懲用副朝廷申明賞罰整飭戎行之至意○張汝梅奏 臣承准軍機大臣字寄光緒二十四年十月初三日奉 上諭本年山東黃河漫溢沿河各州縣被災甚重欽奉 懿旨特頒內帑銀二十萬兩前由戶部奏准勘撥賑信股票銀二十萬兩該省運道漕米悉數截留交張汝梅辦理賑撫并准開辦賑捐俾資接濟惟念青黃不接之時民力未免拮据著傳諭該撫體察情形如有應行接濟之處即查明據實覆奏務於封印以前奏到俟朕於新正降旨加恩等因欽此仰見 朝廷軫念災黎有加無已至意跪誦之下欽感莫名竊查東省災情奇重來年仍須接放春賑以資接濟 臣於籌辦冬賑摺內曾經詳悉奏明在案茲奉 寄諭飭 臣體察情形據實覆奏查山東省災區太廣春賑爲日方長籌賑籌捐一切措

據情形已久在 聖明洞鑒之中自應據實覆陳恭候 恩命惟查東省所收各項賑款除放過急賑并接放冬賑外其留備來年春賑之用僅存十餘萬兩加以酌撥平糶經費十餘萬兩俟來年停辦後仍可收回備用實共存銀二十餘萬兩而平糶不能遽行停辦其款卽一時不能收回以之湊撥春賑要需實恐緩不濟急 現在督飭官紳竭力籌勸而捐務已成務求亦難挹彼注茲體查現在災情辦冬賑固艱窘異常而籌春撫且支持不易以三十餘州縣災區之廣百數十萬災民之多已經涸復田廬卽須酌給籽種其未涸復者仍著妥爲安插撫輯流亡存卹老弱正當青黃不接之際爲時甚久需款必多如不預爲妥籌臨時恐致遲誤此又 臣不能不一再懇求 恩命者也 臣昨讀邸鈔兩江督 臣劉坤一瀝陳淮徐海災重欸絀情形仰蒙 天恩准由戶部籌撥銀二十萬兩以資接濟山東災情視淮徐爲重 恩寬下沛當無待 臣之懇求惟念部庫空虛提撥不易何敢以一省偏災之重久勞 宵旰之勤 臣查山東勸辦昭信股票共收一百一十一萬九千兩有奇除陸續報解劃撥六十五萬暨截留賑欸二十萬兩外實存銀二十六萬九千八百餘兩合無仰懇 天恩俯念東省災情奇重 准予悉數截留以充接濟春賑之用俾 臣預爲籌備以濟民食而廣 皇仁允之○戊戌總理各國事務衙門奏廣西南甯請比照岳州府成案自開口岸從之○諭從來爲政首重用人而人才之優劣當以心術之純疵爲斷近來仕途日雜趨

向多歧舉錯之方尤宜審慎嗣後中外大臣務當秉公持正於所屬各員隨時留心考察擇其心術端正辦事認真者量材器使至浮薄巧僞徒託空言者雖有才華亦宜嚴爲屏斥用副朝廷崇實黜華澄敘官方之至意○己亥加賞梁家園百善堂煖廠米石○陶模奏准調署甘肅提督喀什噶爾提督張俊咨開提督奉軍機大臣字寄光緒二十四年十月十六日奉 上諭現在張俊署理甘肅提督著陶模每年籌撥銀十萬兩解交該提督招募五營揀派營哨各員就地認真訓練遇有徵調再行按照行餉發給將此各諭令知之欽此遵 旨寄信前來維時提督正在固原校閱營伍隨即馳回省城欽遵辦理擬招募中左右後步隊四營前營馬隊一營合符五營之數按照坐糧章程核算計馬步五營除開歲需銀一十三萬一千二百七兩二錢四分此項銀兩擬請飭司隨時撥解以便散放如有徵調再照湘軍行糧章程核辦所需軍裝子藥帳房暨製辦旗幟號衣經費另案請領除招募足額派員擇地訓練另請奏報外茲開具營制餉章數目清單咨請分別立案等因前來伏乞 飭部立案施行下部知之○延茂奏查現在添募靖邊新軍步隊五營分撥鐵路工次駐守經奴才飭令該管帶等勦加操練務期技藝嫺熟方足以資巡防而衛路工所有應需鎗械礮位業由防軍備存軍械項下預先製造以備需用茲飭練軍全營翼長明順等將新軍應需各項軍火按照防軍定制從減核算飭據機器製造局核實估計每年應

需銀二萬兩並咨稱該局常年經費銀僅九萬餘兩現經部定新章減平核放復值物價逐年騰貴撙節動支僅供備有各軍軍火之用已形竭蹶實難再行分給新軍應請另籌的款免致貽誤等語奴才覆查屬實竊維時艱帑絀此次添練新軍常年由部請領正餉已屬萬不得已之舉至應需各項軍火自應設法另籌查吉省鑄造銀圓所得盈餘銀兩前經奏明除留備鑄本外再有盈餘隨時另款存儲聽候撥用在案所有此項軍火銀兩擬即按年由銀圓贏餘項下照數支發俾得先期製造免誤要需至所造軍火及動支銀兩數目應俟每年年終由該局造報軍火案內分別列銷惟是銀圓鑄造衰旺無常卽贏餘銀兩之多寡難定倘將來或有不敷接濟之處再當隨時奏明請旨辦理下所司知之○諭軍機大臣等有人奏江南通州劉海沙地與常熟江陰毗連近時耆老曾紅幫糧幫所窺宅有船有械沿江鄉民皆受其害等語著劉坤一體察情形酌調勇營駐紮其地並飭通州常熟江陰各州縣曉諭紳耆力行保甲以清匪黨而固江防○諭前因皖北渦陽等處土匪倡亂竄擾豫境迭經諭令劉坤一鄧華熙裕長等會同剿辦茲據該督等電奏匪首劉珍痘已被官軍生擒訊辦總盟主牛世修等均爲所屬實係著名巨惡當卽就地正法其王宗寨匪首劉成及另股匪首邵大發魯鳳林等亦經先後擒獲分別訊明正法黨羽均已擊散渦陽一帶肅清牛世修窮促逃竄不難剋日之獲等語渦陽土匪起事勢頗猖獗經劉坤一等派

出各軍合力剿辦一律蕩平不致蔓延辦理尙爲安速除牛世修劉元善等仍著通飭各營嚴拿務獲毋任漏網外所有皖豫交界被匪地方年歲荒歉民情困苦加以猝遭蹂躪亟須認真撫恤卽著該督撫等各飭藩司迅速撥款懷遠前有分派委員籌辦賑撫毋令失所將此案辦理詳細情形具奏○庚子歲鐘麟奏遵 旨籌辦廣東省團練保甲現聞練從東莞新安兩縣辦起東莞可得練丁四千人新安可得練丁二千五百人練費由各鄉自籌保甲亦一律查辦此外各府州縣亦陸續申覆遵辦并委員分赴催查會辦斷不准空言塞責得 旨知道了卽著飭屬認真舉辦毋得徒託空言○張汝梅奏竊照東省本年河決爲患漫口之多工程之難爲近年所未有臣嚴飭在工員弁分投籌堵核實估計深知庫款奇絀逐處力求撙節原續請撥銀五十六萬兩數非不鉅無如各處漫口非頂衝生灣卽對岸生灘全河大溜側注形勢愈變愈險口門愈刷愈深辦理極形棘手迫桑家渡旋堵旋鎔單占萬難抵禦幾至功敗垂成不得已專摺奏明改用雙占始行堵合惟是單占改雙以一工而用二工之料經費因而倍增如楊史道口原佔亦係單占因有鑒於桑家渡冒險進占轉致多費不敢輕於嘗試是以統改雙占計水旱等工正邊兩壩各長至五百餘丈卽此一處漫口已支用經費銀三十五萬餘兩而善後事宜如加填土樁幫寬後戩鑿修埝壩一切必不可少之工尙不在內其中變通辦法皆爲初意所未料及中游王家廟桑家渡楊

史道口三處口門先後堵築合龍只用過銀四十九萬餘兩上游楊莊工需僅領過銀六萬餘兩存欸不及萬金乘此事機稍順楊莊急須堵合但工程浩大又爲黃運交匯之所內衝外刷一片汪洋至無土可取鄰近盡屬災區道遠取土購料耗費益繁且銀價有落無漲工料夫價在在皆須現錢應付以銀易錢較往年每兩少換京錢一串上下就欸統算實在暗耗京錢五十餘萬串此中爲難情形當邀 聖明洞鑒現在潯加估計中游已堵各口善後工程至少必需五六萬兩上游楊莊堵口不敷經費尙需銀十三四萬兩均須立等支發幾有停工待欸之勢東省司道各庫苟可設法騰挪斷不敢冉三瀆請上煩宸厪無如連年籌辦工賑湊還洋債及新添支撥各欸早已搜括一空本年錢漕復多蠲緩庫廩入不敷出然漫工關繫緊要口門一日不堵民生一日不安其勢不容稍緩輾轉思維一籌莫展惟有籲懇 天恩俯准 敕部發的欸銀二十萬兩以濟急需而完全工出自 鴻慈逾格得 旨戶部速議具奏○辛丑譚鍾麟奏本年迭奉 諭旨飭令振興農政獎勵工藝並設立商務局選派員紳開辦等因復奉 皇太后懿旨農工商諸務責成各督撫在省設局分門別類詳切考核庶有實濟等因欽此伏查廣東省三面濱海地狹人稠並無曠土天氣溫和一歲之收茶桑果木四處成林人多無田可耕野無不耕之地惟責令多種茶桑稍獲微利此農務之大概也至工商兩項較他省爲盛近年風氣大開有以機器仿製洋貨

者有製土貨專銷外洋者造作日精行銷日廣而出洋之工商惟粵人爲最衆或挾資營運或備赴爲生但能勤儉自持鮮不歸囊充初粵中所謂殷富者類皆得自外洋縱未能抵塞漏卮亦可稍分餘潤此工商兩務之大概也今就省城司後街地方遵旨設立農工商務總局由藩司派委候補知府周德溥駐局經理會商府縣紳士確按地方情形悉心請求妥爲勸導期於由近及遠諸務振興利源日闢則民困日蘇矣得旨知道了仍著認真講求自闢利源毋得有名無實○諭長萃等奏各旗承領甲米兵丁聚衆入倉挑剔米色請飭各旗都統遵例約束一摺前經倉場衙門奏定章程新陳搭放定爲九新一陳並聲明嗣後開放各項米石均應按照成數以潔淨堪食之米分別新陳放給立法不爲不習乃據稱各旗兵丁竟有聚衆入倉藉挑剔米色爲名肆意喧嘩不服彈壓實屬不成事體朝廷以甲米養養兵丁恩施至渥各該旗都統自應諭令該參領等照章承領嗣後倘有不遵約束恣意挑剔及入倉肆擾情事卽著據實參辦以儆刁風至該衙門職司食務亦當仰體國家慎重兵儲之意於兵丁應領甲米嚴飭各倉監督等挑選潔淨可食者遵照成案核實開放不得任聽花戶人等有意把持攔雜米色致滋弊混以重倉儲而恤兵艱○壬寅欽奉 慈禧端佑康頤昭豫莊誠壽恭欽獻崇熙皇太后懿旨大學士榮祿著加恩開復降二級留任處分吏部尚書啟秀著加恩開復降三級留任處分總管內務府大臣崇光前得降二

級前任降一級留任又降三級留任處分立山前得降二級留任降一級留任革職留任處分世續前得降三級留任處分均著加恩開復內閣學士張自熙著開復革職留任處分都察院左都御史懷塔布著加恩賞還花翎○癸卯調緩江淮蘇州等府州縣衛所被災錢糧米豆○諭黃槐森奏請將武弁懲處等語管帶營林防營留粵補用游擊蔣錫魁管帶龍州防營總兵銜留滇補用副將何元鳳管帶南甯防營游擊銜儘先補用都司劉得勝前因營林滋事防守多疏未能親往助剿實屬畏葸膽怯均著卽行革職以示懲儆該部知道○乙巳欽奉 慈禧端佑康頤昭豫莊誠壽恭欽獻崇熙皇太后諭旨盛京將軍依克唐阿著加恩賞還花翎並法什尙阿巴圖魯名號杭州將軍濟祿前得降二級調用處分直隸總督裕祿前得五次降二級留任又革職留任處分察哈爾都統祥麟前得革職留任處分山西按察使錫良前得革職留任處分均著加恩開復左翼前鋒統領鑲黃旗滿洲副都統芬車署正黃旗滿洲副都統德雲均著加恩開復降一級留任處分福甯鎮總兵曹志忠著加恩開復革職留任處分○張之洞奏湖北宜昌施南兩府與川省毗連自川省余蠻子鬧教以來訛言四起該兩府哥老會匪素多亦名江湖會聚思效其所爲與各處教堂爲難廣播余蠻子僞示煽惑民心臣當分飭宜施文武嚴拿造謠匪徒認真防範本年九月二十四二十九 施南府屬利川縣川楚交界地方有匪聚數百名假託余蠻子旗號擾至

該縣將野茶園李子壩等處教堂育嬰堂燒燬並焚掠教民房屋園縣大擾臣電飭署施南協副將楊通純派兵會同署知縣蔡國楨迅赴掩捕立將匪徒擊散拿獲匪黨七名其教士女嬰人等九十餘名均經救出由該縣分別厚撫該縣前定計十月十五日宜昌府屬長樂縣教民劉義敦因聽教民舉開榜唆使休妻起釁與民爭訟匪徒從中煽動遂聚眾將開榜殺斃焚燬教堂擾及長陽巴東等縣殺斃比國洋教士董若望一名到處焚掠教堂慘殺教民該匪以偽主帥向策安爲首李策卿李少白次之立有偽軍帥統領先鋒大將等名目李策卿本係蕤軍散勇改裝道士兼以邪說惑人張貼偽示招眾集黨山中會匪聞風響應長樂縣屬漁陽關另起李清臣會匪一股與爲聲援旬日之間眾至二三百人旗上大書滅洋字樣率眾四出分擾三縣並突至湖南石門縣子良坪地方焚掠教堂教民洋教士方復思逃至澧州經地方官保護尙未被害各該縣會黨滋蔓日廣匪蹤大熾聲言係余蠻子分股欲渡江直撲宜昌府城一面由巴東建始東趨川境與余匪合宜昌係通商口岸華洋震恐漢口法領事宜昌英領事屢次函照切請保護除匪沿江上下大爲驚擾當經宜昌鎮總兵傅廷臣稟請急速募勇五百人以鎮郡城署利川縣知縣蔡國楨募勇一百名以防川匪荊州沙市人心亦頗惶惶伏莽皆思竊動臣以山深地廣君不夫舉及早撲滅擾及宜昌必致成燎原之勢當派候補知府朱滋澤總辦宜施兩府會匪事宜派副將吳元愷

帶勇兩營副將劉恩榮帶勇一營乘輪馳往並飭宜昌鎮總兵傅廷臣派委游擊鮑佑卿守備王佐賢帶練軍一百名馳往該處分路入山攻剿先令吳元愷繞至上游巴東野三關一帶截其入川之路並飭宜昌鎮施南協各派練兵分投截擊署巴東縣知縣恩潤長陽縣知縣寶以莊均各督團扼要剿捕復因荊州喫重派提督鄧正峯帶勇三營扼紮東路漁陽關派河防營游擊蔣璧耀帶勇兩哨扼紮下游宜都縣聶家河一帶遏其下竄荊州之路並電商湖南撫臣俞廉三飛飭總兵陳海鵬提督賀良發譚會友參將徐建盛等酌帶營哨自石門縣越境會剿該匪竄至長陽車綫棚地方適與鮑佑卿之軍相遇夜間潛來襲營被官軍擊退斃匪五人斃匪馬四匹奪旗六桿兵丁陣亡一名受傷十一名團丁陣亡一名知府朱滋澤及副將吳元愷一軍入山復出示解散從匪黨漸散該匪見官軍已扼上游不能入川折而東趨節節內避意欲引我軍深入險阻負隅相拒以困官軍愷軍由小塘河等處奮力窮追該數縣跬步皆山嶺高峯險並無徑路可尋又值大雪冰凍嚴寒山中米穀素缺官軍裹糧奔馳備極艱苦該匪沿途私集賊衆復盛回竄長樂署知縣蘇貽英到任甫經數日布置未周遽聞匪至率役督團出擊詎書役團丁多係入會通匪遂將該縣劫逼擁入山寨禁制不放與史亦被關禁該縣向係殘破土寨間有零落雉垣數尺與無城同該匪闖入縣城大肆劫掠因闖兵勇將至旋即退出回至該縣西北之經溢兩寨內搜集城

汛鄉團鎗礮堆入巨石憑險拒守該兩寨陡峻異常白溢尤爲高峻寬廣周圍三十餘里其上有寨可容千人素稱天險嘉慶初年教匪爲亂占踞累年始經官軍攻克該匪分設多卡抵死抗拒副將吳元愷帶隊赴該處親督弁勇緣崖攀木奮勇仰攻先後將兩寨擊破殺賊一百三十餘名我軍陣亡二名受傷六名奪獲大小旗幟數十面鎗礮數尊接鎗數十桿餘匪潰散奔逃墜崖跌斃者甚多遂將各官救出附從各匪分別懲辦繳票免罪被擾居民妥爲安撫朱滋澤到長樂後將該縣會黨切實清查其夫役團眾匪賊劫官者訊明正法會督各營及本省鄰省附近州縣分派兵團截緝餘匪先後據各路文武稟報拿獲要匪多名內有長陽一股匪首覃培章一名已經格殺宜都一股匪首袁敦五一名漁陽關一股匪首李清臣張么兒二名均已訊明就地懲辦其殺斃洋教士之首犯楊大經及焚燬教堂首犯呂守蛟二名先經長陽縣督團拿獲解至宜昌由該局陳其璋覆訊供認屬實均已正法其倡亂劫官之首匪僞主帥向策安現經施南府知府額勒恆額署施南協副將楊道純分派兵團兜圍擒獲審辦惟其次匪首李策卿李少白等均尚在逃嚴飭分路懸賞截拿斷不容其漏網此宜施會匪開教爲亂派兵剿辦之實在情形也查宜昌施南兩府爲鄂省邊隅界連川湘地勢極爲險隘官軍罕能深入游匪會黨伏莽甚多匪徒遂藉此以行其煽惑之計以致糾集響應勢極猖獗現雖攻破巢穴渠魁就擒而匪黨尙須查緝現已飭令

朱滋澤會同宜施兩府迅提已獲之首匪各犯悉心研審從嚴懲辦一面會督各屬將教案及會匪兩事大加清查妥籌善後辦法務使地方一律平靖民教照常相安以紓宸廑除由臣查明疎防文武員弁積案另摺奏參暨陣亡兵勇查明請卹外查此次會匪起事蔓延甚廣焚掠三縣擾及鄰省專以滅洋攻教爲名愚民紛紛附和若一經出山必致不可收拾加以山深地苦雪大糧艱各軍深入攻剿備歷艱苦幸得一舉撲滅免致燎原於交涉事體不致別生弊端不無微勞足錄合無仰懇天恩准臣擇其深入剿匪尤爲出力者據實保獎以勵戎行出自逾格 鴻慈特 旨准其擇尤酌保數員毋許冒濫○丁未祭太廟遣臧助恭代行禮○欽奉 慈禧端佑康頤昭豫莊誠壽恭欽獻崇熙皇太后懿旨松椿奏清淮一帶被災甚重籲懇撥濟以資賑撫一摺本年江北一帶迭被水災窮民不下二三十萬雖著劉坤一等特派委員攜資前往工賑兼施而災區甚廣爲日方長恐難周及著加恩撥給內帑銀五萬兩卽由江蘇庫先行墊發以便及早散放深宮軫念災黎有加無已該督務當嚴飭各員核實經理勿任稍有弊混餘著照所議辦理該部知道○是年與各國修訂長江通商章程十款又續補內港行駛章程九款○統計出口貨值銀一萬五千九百三萬七千一百九十四兩進口貨值銀二萬九百五十七萬九千三百三十四兩相抵虧五千五百四十二萬一千一百八十五兩凡徵貨稅銀二千二百五十萬三千三百九十七兩

光緒二十五年己亥春正月己酉朔 上詣 皇極殿行禮御乾清宮受賀○命溥偉詣 壽皇殿恭代
行禮○辛亥廖壽豐奏據署溫州道王祖光溫州府知府王琛稟稱永嘉縣屬地方岡嶺重疊最易容匪
奸究歷經設立保甲民團並派駐防營稽查巡緝上年冬間訪聞有匪徒在該縣柑溪一帶煽惑鄉愚散
放飄布當飭縣密諭團營購緝會營緝拿旋探悉匪首宋左亭在距柑溪相近之楓林地方潛匿肆擾經
團營試用縣丞徐家藩等率帶民團前往兜捕一面由駐防湘軍雲字右旗管帶分省試用同知廖維瀚
撥勇協緝該匪宋左亭初猶力圖竄逸繼經徐家藩督團奮勇追捕膽敢持械抗拒格鬪致傷始就擒獲
餘黨解散於該匪身畔搜出銅錢偽印並起獲令箭偽札飄布上有崇華山麒麟堂字樣詞意悖逆訊據
供認匪首散放飄布多張不諱旋因傷重斃命稟經 臣批飭戮屍示儆又據該道府訪聞有八寶山會
匪蕭桂在郡城內外散賣飄布由武生潘嶽麟誘拿並會同廖維瀚各帶營勇圍丁於郡城鐵井欄街
地方設法緝獲解縣訊據供認當八寶山老二在上海濱波溫州等處散賣飄布勾結黨羽潛圖滋事不
諱起獲飄布多張上有八寶山忠義堂字樣並木質偽印等件稟經 臣批飭就地正法梟示以昭炯戒伏
查該匪宋左亭蕭桂膽敢散放飄布創立山堂名目糾夥入山潛圖滋事若非該處團防營勇密探購拿
立時剪除必致蔓延為患今幸在事員董獲辦迅速消除噫患洵屬異常出力著有勞勩可否仰懇 天

恩俯准選擇優酌保數員以示獎勵之處出自 聖裁得 旨准其酌保數員毋許冒濫○癸丑游智開病請解任允之○裕祿奏欽奉 寄諭北洋兼造銀圓是否可以停止著裕祿酌覈情形奏明辦理等因欽此奴才伏查直隸鑄造銀圓係於光緒二十一年間戶部奏准行令各省仿鑄銀圓案內經前督臣王文韶飭據北洋機器局查得該局因試造制錢購有機器一分以之改造二角以下銀圓適合於用添購製半元及一元機器奏明設廠製造該局雖均於北洋機器局廠地之內而所用員司匠徒均係另行招募并不撥用機器人工其鑄本亦僅由各局所及各銀行借撥造成銀圓售出收價轆轤鼓鑄所得餘利按月結報并未請用公款亦未動用機器局經費實於機器局製造軍火毫無礙方今制錢奇絀北省尤甚津郡為通商要區商賈輻輳制錢更形短缺若無銀圓為之接濟錢法壅滯益難支持是鑄銀圓不獨為收回外洋利權亦實為補救內地圖法急務奴才詳加體察北洋機器局鑄造銀圓仍當照舊循環鼓鑄以流通市面俾資周轉未便遽議停止報聞○甲寅以魁元為廣西布政使吳引孫為廣東按察使○湖廣順直各屬被水地方本年春賦○乙卯雪○湖廣陝西咸寧等屬被災錢糧鹽課地租○丙辰諭前因中外各衙門審理詞訟未能迅速疊經諭令隨到隨審隨結毋許拖延近聞在京各衙門於應辦案件仍有經旬累月延未審結者實屬不成事體刑部為刑名總匯所有應審詞訟俱係各衙門送部應行

審定罪名之犯自應從速辦結毫無拖累方足以昭情法之平順天府五城俱有審理詞訟之責該府
尹嚴飭所屬於審理詞訟務當按限審結其業已轉解到府者並著趕緊辦理五城御史嚴飭司坊各員
遇有詞訟不准藉案多傳人證以致稽留守候無辜受累其應行送部者即著趕緊送部均不得濫行收
押亦不准以監候待質含糊塞責致無了期步軍統領衙門亦著照此辦理以重民命而清訟源○丁巳
裕祿奏練兵爲當今第一要務現值時局艱難迭奉 諭旨諄諄以裁營騰餉選將練兵再三訓誡力圖
自強本年十一月間大學士榮祿具奏練兵籌餉案內並欽奉 懿旨以北洋淮練各軍合計尙有三萬
餘人若任其窳惰以有用之餉養無用之兵殊爲可惜卽著裕祿體察情形認真裁併等因欽此仰見
聖慈整修武備綜核名實之至意跪聆之下欽悚莫名伏查直隸地方幅員遼闊負山控海在在均應設
防而畿疆門戶關繫重要尤與他省情形不同現有各營除肅士成衰世凱兩軍專備遊擊之師外其餘
海防淮練各營合之雖覺其多分之猶虞不足歷任督臣未敢輕議裁減實亦出於萬不得已奴才自到
任以來迄今三月有餘體察通省情形詳咨博訪多日無不以此爲急務誠以外患固宜設備而內患尤
宜兼防必須統籌全局規畫無遺方敢見諸施行兼收整頓實效茲經督同各局所司道會同各營將領
悉心酌核查直隸淮練各軍自光緒二十三年裁減後現計實存准軍步隊九營一哨礮隊四營一哨馬

隊十一營五哨四棚勦勇衛隊九棚共二十四營七哨十三棚練軍步隊二十營二哨馬隊十營二旗一隊練勇步隊四營一哨馬隊二營三哨又大沽海口原設防守礮營兵六營四十二營六哨二旗一隊查准練軍章人數餉數本各不同光緒二十三年裁兵節餉案內准軍各營或每營裁一哨或每哨裁一棚練軍各營或裁一成或裁二成或仍原額一軍之中又參差不齊本年三月間曾經前督王文韶覆奏裁減防營原辦法案內擬各就原定營制分別裁改准軍步隊以三百十五人爲一營練軍步隊以三百十六人爲一營馬隊則改營爲旗准軍以二百七人爲一旗練軍以一百九十一人爲一旗僱勇長夫在外惟通盤籌畫原奏所擬辦法係僅裁兵而不裁營然營不裁則官多兵少直隸地方寬廣兵少則分布不敷官多則糜費較大蓋一官之薪費可以養兵數十名不若裁營以併餉減官以增兵庶餉力可紓而兵力不至甚薄現擬酌量變通將准練兩軍分別裁併並將各營親兵護勇加餉概行裁去統按正兵一律支餉又駁減長夫改爲輜重兵期得實用無分准練步隊以官弁兵丁五百人爲一營馬隊以官弁兵丁二百五十人爲一營除楚軍馬隊兩營現經榮祿奏明挑選四百餘人歸入新軍應俟該大臣挑留後卽行裁撤並勦勇衛隊九棚照舊留用外其現存准軍各營內應挑留精銳步隊十八營馬隊二營並山步隊內編立礮隊二營每營加礮十六尊礮馬一百十二匹添馬夫輜重兵四十八名共合准軍

二十營練軍各營除大沽協標六營係專設海口額兵另片奏明外應挑留精銳步隊十二營馬隊二十營共三十三營統計准練兩軍共裁官弁勇夫七千九百八十七員名實挑留官弁勇夫二萬八千四百十六員名嚴立章程慎選將領督飭加意訓練務成勁旅如有空糧缺額操防廢弛卽當據實參辦從前准練各軍原有營名各標一幟未免紛雜此次挑留後所有准軍二十營卽分爲直隸准軍左右兩翼每一翼分中營副中營前後左右前左前右後左後右等名目各共十營以左翼十營駐守山海關北塘等處礮臺歸通永鎮統之右翼十營駐守大沽等處礮臺歸天津鎮統之又挑留練軍三十三營內以步隊十二營分爲直隸練軍左右翼步隊兩軍每一翼分中營副中營前後左右等名目各共六營又以馬隊二十營分爲直隸練軍左右翼馬隊兩軍每一翼亦分中營副中營左營右營前營後營前左營前右營後左營後右營各共十營尙有馬隊十營名爲直隸練軍副營以上練軍馬步各營分割本省本府屬及熱河朝陽等處各將領統帶平時由奴才嚴督操練巡緝彈壓地面並由節制北洋各軍大學士榮祿隨時考核有事一經調遣大軍卽可雲集就直隸全省形勢而論沿海各口以山海關北塘大沽爲最要現在沿海各口礮臺以挑留准軍二十營分防扼守訓練既便責成亦專加以礮士成袁世凱兩軍一駐蘆臺一駐小站可爲大沽北塘後路援應山海關內外又有采慶所部二十五營屯劄聲勢聯絡防務似更

周密至內地各府及各邊隘現有練軍三十三營星羅棋布足資鎮懾內外均有可恃至兩軍餉項同隸一省不宜稍有軒輊本年八月間欽奉 懿旨以加餉練兵爲今日第一要政是各軍正餉自當悉從其優而一切雜支仍宜嚴爲核減務使帑無虛糜兵得實惠俾知 朝廷厚養之恩藉以鼓其同仇之氣准軍餉項優於練軍上年部章准餉仍發湘平練餉由庫平扣發京平尤爲見絀現既將營制改歸一律自應統按湘平核發以昭劃一當經詳加釐定步隊礮隊各營管帶官薪水公費及兵丁口糧均照准軍餉章辦理至淮軍馬隊營餉章管帶官薪水公費銀一百五十兩另有車輜書識等項雜支月約需銀一百餘兩現將雜支裁去酌加管帶官公費銀五十兩俾與步隊礮隊一律此次將親兵護勇加餉裁減每營餉項所省實多哨弁薪水過薄殊不足以鼓舞訓練現擬照淮軍餉章哨官每員酌加銀七兩副哨每員酌加銀六兩以示體恤計步隊每營月支銀二千四百七十兩礮隊月支銀三千十四兩馬隊月支銀二千二十八兩淮軍原存二十四營有零歲支銀八十三萬餘兩挑留二十營連勦勇衛隊歲支銀六十萬餘兩約可節省二十二萬餘兩練軍練勇實存三十六營有零歲支銀一百二萬餘兩留二十三營歲支銀八十六萬餘兩約可節省銀十五萬餘兩又淮軍水師本年裁撤後路轉運各局師船二十九號約可節省銀二萬餘兩共約節省銀三十九萬餘兩惟北洋餉源全仰給於他省必須按照部撥原額一律解

足始能節省此數近年各省關公爲攤還洋欸所窘短解甚鉅究可節騰餉項若干殊難豫定確數且此次練餉改發湘平按照京平覈算每年約須補平銀二萬餘兩原扣京平平餘部議係備湊還洋欸之用若因軍餉改發湘平遽行停解恐部庫又致短絀爲難自應於裁併節省項下每年照數撥補報解以資兼顧又本年七月間遵 旨籌撥船政經費改解部庫奏明在於裁兵節餉項下每年認籌銀十萬兩亦須按年報解此外尚有各軍統領公費巡哨加夫均須由此開支又每年協解熱河練餉一萬兩撥永定東明兩河燒磚經費銀二萬兩近來餉需日絀亦不能不藉此騰挪即使各餉照額解足而節省餘欸亦屬無多大學士榮祿原奏請將淮練綠營裁併騰出的餉卽以酌加宋董各軍正勇之餉使與新建一軍相同查宋董三軍馬步共有八十餘營今詳加酌核騰出之欸專加添士成一軍正勇餉項約可敷用宋董兩軍恐難兼顧至挑留各營海口內地各有所宜淮練現存各營不能不互相更易裒益其間且淮軍現亦北人居多自可以此補彼不必拘定原營稍涉遷就所有大沽北塘海口及永平古北口熱河應挑各營擬廣成提督聶士成督率挑選內地應挑各營省城卽派藩臬兩司外府卽派該管道府會同挑選務須破除情面切實核辦總須汰弱留強一兵得一兵之用俟奉 旨後卽當分飭各營妥速辦理裁汰兵勇分別籍貫遠近照章給予遣餉開河後卽可分別資遣所需遣餉由協餉項下開支一面將挑

定各營派員點驗再按新章支領餉項並將截清數目日期專案造冊報部再直隸綠營制兵上年經前督臣王文韶奏明分作三年遞裁一成本年已裁過一次明年仍接續裁減合併陳明得旨如所請行

○戊午雲○時享 太廟遺奕劻恭代行禮○裕祿奏光緒二十四年九月初五日承准軍機大臣字寄九月初二日欽奉 上諭以近來各省洋操需用鎗礮約增數百倍不如就天津上海江甯等處局廠擴充製造以便各省分途取運飭令會籌酌核辦理又於十一月十一日承准軍機大臣字寄十一月初九日欽奉 上諭天津上海江甯湖北製造鎗礮械較有規模若非嚴定課程難收實效飭令確查各該局廠現有機器若干每年實能造成何項鎗礮藥彈若干估定確數通盤籌算按季奏報倘有虛糜廢弛情弊卽著嚴參懲辦嗣因大學士榮祿奏飭南北洋等省趕造鎗礮復奉 諭旨令就地籌款移緩就急迅卽製造各等因欽此查北洋製辦軍械備有二局一爲機器局一爲製造局現有製造黑藥藥棉藥無煙藥毛瑟鎗子銅帽并各種後膛礮彈兼造硝磺鎗水雷電器具捲銅練鋼等項機器所出數目黑藥每年能造四十四萬磅加工可造七十餘萬磅藥每年能造二十萬磅加工可造二十四五萬磅棉藥每年能造二萬三千磅加工可造五萬餘磅無煙藥每年能造八千磅毛瑟鎗子每年能造三百八十二萬粒加工可造四百餘萬粒銅帽每年能造一千五百萬粒加工可造二千八百餘萬粒鋼彈每年能造一千

二百顆至礮子一項名目繁多大小不一向由軍械局按照備操備戰隨時酌定交局照辦就製辦最多之數考核各項大小礮子每年能造一萬四千五百六十箇製造局現有製造後膛礮子哈乞開司鎗子攪者士得礮子三十七密里哈乞礮子又自行鑄配四十七密里哈乞礮子後膛攪礮前膛攪鎗及鎗子等項機器按各機器所出數目每年能造七生脫半開花礮子一萬二千顆銅六件一萬六千副克鹿卜鐵身礮車十輛銅管拉火二萬四千支哈乞礮子五萬顆哈乞開司鎗子二百十萬粒攪者士得鎗子一百四十萬粒近年各局經費短絀甚鉅應造各件不能不分別停減擇要製辦以期移緩就急機器局將果藥鋼彈經費勻出仿造快鎗子彈製造局將哈乞礮子經費騰出改造各式攪鎗如經費充裕仍可一律加多據各該局將各種機器名目及額造各項鎗械子藥分別開單具詳前來奴才查製軍械爲當今第一要務而製造之增減視經費之盈絀爲衡北洋餉源本絀近來各省解款日少故儲有各項鎗礮應用子藥及水雷旱雷電纜等件以外屢欲擴充添造快礮均以款絀中止本年五月間曾經奉 寄諭飭各省機器局配定快礮格式及子彈分量造法互相討論折衷一是等因當經各局所會商各營將領詳加考核鎗以小口徑毛瑟爲利於戰陣而平日操練則單響毛瑟亦頗合用礮以格魯森五生的七過山快礮爲得力而新建陸軍現有克鹿卜七生的半陸路快礮七生的過山快礮爲尤勝自應於此數種內

擇其精利合用者先行仿造無如需款過鉅既難同時舉辦亦非獨力能支北洋向無鎗礮亦需通盤籌畫如購買仿造大小口徑毛瑟快鎗機器全分連建造廠屋需款鉅萬以外卽就現有機器略加添配設法仿照每年祇能出鎗數千枝而需款亦約二十餘萬庫儲奇絀一時實無此財力現僅購有製造三十七密里至五十七密里快礮機器一分又仿照曼利夏快鎗子彈機器一分甫經運到正在建設廠屋加工總辦約須明年秋間方能開造而五十七密里快礮子彈必須添機自造當於明春設法籌款接續趕辦方不至有礮無彈仰給外洋至快鎗一項南洋湖北均已設廠自造應卽詳加考究如果精利合用則專由該兩省認造快鎗分撥濟用北洋鎗廠卽可暫從緩辦祇須再添克鹿卜新式七生的半並七生的兩種快礮機器專認製造快礮以備各省分途取運昨經咨商兩江督臣劉坤一湖廣督臣張之洞合力通籌折衷一是應俟該兩省會商核覆籌定辦法再行奏明辦理奴才應隨時發飭各局員認真籌辦精益求精並將應造各件數目按季就款核定嚴立課程每季據實奏報如有虛糜廢弛卽當嚴參懲辦仰副朝廷慎重軍實之至意下部知之○己未諭前據升任太僕寺少卿岑春煊御史馮錫仁先後奏參廣西巡撫黃槐森臬司蔡希邵右江道黃仁濟因循玩愒營私納賄各款當經諭令陳寶箴確查具奏嗣陳寶箴因案革職復經諭令俞廉三認真查辦茲據查明覆奏廣西巡撫黃槐森被參各節多係傳聞之

誤該撫於平日官方營務尙能講求當匪亂紛起時以餉糈兵單未能相機立辦迨奉旨切責卽親自督師地方以次敕定功過尙足相抵著免其置議廣西地居邊徼現在匪亂初平彈壓撫綏均關緊要該撫務當振刷精神妥籌措置毋負委任調補雲南按察使蔡希邪雖無納賄營私確據實有租庇同鄉引用私人情事且該臬司屢被參劾聲名甚劣著革職永不敘用右江道黃仁濟方馬平匪案初起時辦理不無遷延不勝邊陲之任著卽行開缺梧州府知府張璧封因循玩寇坐誤事機候補知縣葉能棟迭謀要差鐵營有跡前隆林營守備王起鴻懦怯無能實功邀獎均著卽行革職以肅官方餘著照所議辦理該部知道○庚申調錫良爲湖南按察使以李廷鑑爲山西按察使○諭鄧華熙奏查明土匪起事情形請將地方各員懲處等語此次潯陽匪酋牛世修等聚旗起事該縣知縣歐陽雷並不及早認真拿辦以致蔓延通縣波及鄰封疲庸釀亂厥咎甚重歐陽雷著卽行革職永不敘用候補知縣陳福源在潯陽署任時緝捕廢弛諱盜縱奸僅予革職不足蔽辜著一併革職永不敘用以示懲儆該部知道○辛酉祈穀於上帝遣溥靜恭代行禮○以王連三爲廣東高州鎮總兵○裕長奏查河南綠營官兵欽奉疊次諭旨飭令實力裁汰當經調任撫臣劉樹堂遵照部定裁七留三之議連二十二年所奏應撤三成在內綜計議裁馬守兵八千一百八十二名遊擊都司千把經制一百二十三缺自奉旨之日起以大崎月爲

一期分作三期一律裁併完竣等因於光緒二十四年五月二十八日具奏六月二十四日奉 硃批照
准欽遵分行飭辦在案查裁及制兵原屬 朝廷萬不得已之舉本年正月間恭奉 寄諭裁撤無用以
歸有用恭釋之下莫名欽感奴才忝膺疆寄具有大良何敢心存見好於已經奏定之案遽思更易惟是
豫省情形與各省不同現今裁兵甫至第一期業已情見勢絀民情惶恐盜案疊出事關大局有不得不
量爲變通者敬爲我 皇太后 皇上陳之河南界連七省幅員遼闊道路紛歧舉凡捕盜解犯護餉運
糧無一不藉資兵力而歸陳一帶爲豫東門戶北接山東曹單南連穎亳肅碭素爲盜匪出沒之區加以
近年山東江北迭遭水患逃荒之戶接踵而來紛紛流入豫省恃衆滋擾又因渴匪作亂謠言四起所在
驚恐動輒需兵彈壓況目前講信修睦 國家嘗示懷柔各國教士洋商之持照來豫游歷者絡繹於道
轉瞬蘆漢鐵路開辦直達豫境洋匠工頭亦必不少南省風氣未開民情不無駭異倘所至與百姓稍有
齟齬釁端又將立啟全賴守汛弁兵保護開導方能日久相安以該兵弁等身皆土著取其與地方熟悉
而人易信從也如將各營汛官兵照裁裁遣不特盜匪之竊發堪虞卽此尋常保護彈壓等事亦難維持
如謂廣成地方官酌派自募勇隊則各屬缺分難皆齊整勇無多轉使有所藉口難保不別行科斂或
令分撥勇營以輔兵力之不足而豫省因庫藏匱乏迭次裁汰緝捕巡防已屬不敷調遣倘再添募則養

勇之費較養兵爲更優是欲節省而翻多糜費況現在餉需支絀更復何所籌措爲添募之資奴才此次一入豫境見已議裁之處塘鋪墩臺均形廢壞鄉老紳耆竊謂自裁汛後地方不靖民不聊生環求規復有願自備民勇以充役使者可見綠營兵弁不盡無用及接任後迭據各鎮將以地方緊要兵力實在不敷守禦動多掣肘紛請以本年十二月二十四日第一期應裁之數爲止請免再裁以免貽誤等情臣呈前來奴才竊思應事宜以澈乎始終立法乃可期其經久河南省居腹地設兵原少僅敷防守之用一旦裁七留三直若空虛無兵且從前建營設汛扼守要隘具有深意亦未可一概廢棄前撫臣於裁兵一事曾經奉 旨申飭惶悚之餘未免操之過激初未料及事多窒礙有如此之難者奴才現在體察情形既係有關大局曷敢迴護前奏緘默不言伏讀邸鈔本年八月間陝甘督臣關模奏裁提督各員弁兵丁一摺恭奉 硃批裁兵一事總宜察酌地方情形可裁則裁不可勉強從事致貽後患等因欽此仰見 皇太后 皇上於裁兵節餉之中仍寓慎重地方之意嗣經督臣覆奏免裁仰邀 俞允又山東撫臣張汝梅遵 旨覆奏免裁營弁兵丁一摺亦已奉 旨照准均經欽遵有案河南事同一律合無仰懇 天恩俯念地方緊要請將原奏議裁之兵丁裁至二十四年十二月二十四日第一期所裁之數爲止計連二十二十三兩年已裁四千餘名實已足敷四成其明年第二第三期之應裁者即請免其再裁仍照原額

在留漢於營伍地方兩有裨益至議裁員弁一百二十三缺雖職位之大小不同惟各有汛守之責是羅
棋布立制本極周詳今年三月前撫臣劉樹堂初次議奏應裁綠營官兵一摺承准軍機處知會奉 硃
批該官一節著斟酌妥辦毋得操切等因欽此仰見我 皇太后 皇上洞燭幾先無微不至循誦再三
爲勝欽佩應請仍復舊制其已裁之缺不復添設以節餉需可否之處出自 逾格鴻慈允之○壬戌諭
內閣戶部會奏內外臣工情殷報効籲請將認領股票銀兩俯准賞收開單呈覽一摺前因戶部用款浩
繁議辦昭信股票以資接濟王大臣等有奏請報効者多未允准原係國家不得已之舉不欲重累臣
僚也茲據榮祿等奏稱京外大小各官情殷報効出自至誠仍請免其領票並不敢邀獎等語該大臣等
深明大義公爾忘私既經再三籲懇若仍不允准轉無以遂其忠懇之忱著卽俯如所請自王公以下京
外大小文武各員已經認繳之款毋庸給票准其作爲報効慶親王奕劻之子載振著賞給頭品頂戴恭
親王溥偉肅親王善耆端郡王載漪貝勒載瀛輔國公載瀾均著宗人府議敘其京外文武大小各官均
著交戶部分別核給移獎已革戶部尚書翁同龢已革禮部尚書李端棻已革戶部左侍郎張蔭桓所繳
銀兩著傳各該本籍收存贓罰庫專案具報另片奏廣東巡撫鹿傳霖報稱本籍定興縣士民認領股票
銀兩請由該撫如數代繳不敢領票亦不敢邀獎等語著准其代繳一併核給移獎至各省紳商士民認

繳之款仍照原議按年計利如期還本以昭大信單二件併發○孫家鼐奏去年安徽潯陽等處匪徒倡亂接連河南等處幾致燎原幸賴剿辦迅速旬月之內卽已肅清惟是賊衆雖曰兇頑半爲饑寒所迫蓋皖省江淮一帶以光緒二十四年水災爲最廣其實二十三年先有水患去年冬月水未盡退雪澤又稀二麥多不能種則今春青黃不接生計尤艱名曰一年被水實已三年歉收是以民心益生惶迫恭讀去年十二月二十日 諭旨皖豫交界被匪地方年歲荒歉民情困苦加以猝遭蹂躪亟須認真撫恤卽著

該督撫等各飭藩司迅速撥款懷遵前旨分派委員籌辦賑撫勿令失所等因欽此仰見我 皇太后

皇上軫念民生痼瘼在抱之至意竊計皖省鳳陽潁州泗州所屬撫恤災黎用款不下二十餘萬兩在封疆大吏於經費支絀之時籌策已不遺餘力無奈災歉連年日長地廣興辦杯水拯救頗難頃接安徽壽春鎮總兵郭寶昌電報一紙大意謂賊勢已平尙宜賑撫謹將該總兵電報鈔呈 御覽近者山東黃

河爲災經山東京官邀請在京大臣等公同商告各省代爲乞糶各省督撫司道顧全大局亦頗盡力協助大約可得二十餘萬兩惟是各省之精華有限而鄰邦之災歉頻仍此時皖省再爲請賑恐難籌之末協濟爲難可否 飭下安徽巡撫電商各省督撫竭力籌款協助准其捐資之家從優請獎或可集成鉅款以資賑濟而奠民生 上諭協辦大學士孫家鼐奏皖省飢民甚衆請飭籌款接濟又御史余誠格

奏院北各屬請速辦春賑各摺片前因安徽鳳順等屬重遭荒歉特由戶部撥銀八萬兩交鄧華熙核實散放並以涵匪滋事難保無災民因飢掠食諭令劉坤一等通籌賑撫朝廷軫念災區無日不深焦慮孫家鼐等所奏各節皆係早經籌辦之事惟該省災情甚重仍恐賑款不敷散放著戶部再行撥銀五萬兩交鄧華熙遴派委員分赴各屬將春賑事宜迅速籌辦務須核實散放不得敷衍了事並籌辦義賑平糶以輔官賑所不及孫家鼐所請由鄧華熙電商各省督撫勸捐協助准其請獎以集鉅款之處著該撫體察情形酌核辦理該部知道○癸亥調阿克丹為兵部左侍郎溥頤為刑部左侍郎○乙丑諭近來各省應解部庫各款多由號商以銀票匯兌京師銀安得不日形虧短嗣後著各省督撫照應解部庫各款一律籌解實銀赴京交納不得以款絀途遙藉詞搪塞其沿江沿海及近畿各省督撫於應解部庫各銀款內並著搭解制錢一成以資挹注○諭前據奏寶鎮總兵祥霖奏參西陵守護大臣毓慶等廢弛陵祀祀典並職官銷燬大臣受賄各節當經諭令崑岡驛馳前往查辦茲據查明覆奏請分別革職議處等因詳加披覽尙多不實不盡之處毓慶參款既據委員密票家人徐岳泉向有徐貝子之號自必有實在劣跡可指翼長敬信不時赴府致招物議其於派差挑缺等事必有干預豈得僅以不知連嫌四字了之至所稱防禦岳嵐常在榮府中幾無虛日物議所叢當由於此竟以想像之詞置諸不論不議尤不

足以盡之現宋村木案既稱徐岳泉攻訐詐竊毫無款據卽應切實研訊以期水落石出何得因徐岳泉一人在逃輒予先行定案且宋洛福向毓慶所賠何罪全榮家人趙子時與徐岳泉狼狽爲奸亦非驅逐回籍所能蔽辜竊奏多涉含糊實屬不肯任怨所有該大學士查奏各節仍著督飭隨帶司員按照原參並此次諭旨指駁各款逐一澈底根究明晰具奏一面咨行順天府等衙門嚴拿徐岳泉歸案審辦毋得稍涉徇縱近來各省查辦事件大員往往瞻徇情面於飭查緊要事端敷衍了事僅摘出一二細故薄予虛分此等故套竟成銅習卽如薄良查辦山東賑務亦難免不實不盡豈謂朝廷洞鑒所不及耶嗣後務當各矢天良任怨一經奉旨查辦卽不得稍存避嫌之見致負朝廷諄諄訓誡之至意○丙寅諭翰林院侍講學士陳秉和奏弼臣稟稱督糧復詐貪婪據實糾參一摺據稱山東巡撫張汝梅性喜逢迎用人不當要差優缺悉委私人張上達行賄三萬兩由歷城縣過付幕友卞寶昌包攬把持任情顛倒信任崔廷桂等爲心腹及沿河謬妄百弊叢生辦賑不實始終掩飾捕務廢弛劫案迭出各等語張汝梅身任疆寄具有天良所參種種劣跡如果屬實殊爲大員委任著薄良按照該學士奏參各節確切查明據實具奏毋稍徇隱原摺並著鈔給閱看其所稱李鴻章到山東館舍器具一切窮極奢侈日費千金復每日折銀若干名爲薪水隨員等各滿其欲到省之後日日不停筵宴費幾萬金等語該撫如果竭力逢迎奢

華如此該大學士卽應立時參奏當不至安然受之原摺內所稱此言一出內而見忌於廷臣外而見憎於使臣諒必確有可據著陳秉和卽明白回奏○丁卯雪○諭軍機大臣等練兵爲當今要務迭經諭令各直省將軍督撫各就本省餉力妥定章程認真辦理該將軍督撫等受恩深重自當共體時艱力圖振作迅速舉行現在某省實能籌餉若干練兵幾營何人統率未據切實奏到著各督撫懷遵歷次諭旨通籌妥議限一月內迅卽覆奏督撫均有提督軍務兼理糧餉之責提鎮爲專閫大員兵事尤責無旁貸所有此次練兵有提督省分應責成提督統領通省各營無提督省分應於各鎮中遴選熟諳軍事之員總司營務總以痛除缺額餉餉爲第一要義然後申明紀律勤加訓練務期一兵得一兵之用建威所以銷萌宵小既不至生心卽使地方有事徵調亦可以立應該督撫仍不時校閱賞罰嚴明以節制之師爲緩急之用至各省駐防生齒日繁聞散中不乏精壯之士並著該將軍等各就本處情形挑選若干教練成營以資捍衛所需餉項應與該省督撫藩司妥籌協撥奏明辦理用副朝廷講求武備諄諄誥誡至意將此由四百里各諭令知之○戊辰諭前據翰林院侍講學士陳秉和奏參山東巡撫張汝梅摺內自稱此言一出內而見忌於廷臣外而見憎於使臣當經諭令明白回奏茲據奏稱侍郎立山前任織造時張汝梅以候選道辦江南鹽務與爲密交大學士榮祿前任西安將軍時張汝梅以陝西藩司護理巡撫相交

甚密等語覽奏殊堪詫異立山前任蘇州織造張汝梅領運票鹽引地連在淮北榮祿由西安將軍於光緒二十年八月來京張汝梅於二十一年正月由山西臬司簡放陝西藩司其護理巡撫則在是年四月斯時榮祿早已在京供職所稱往來交道之密已可不辯自明卽在同城亦安見卽有密交曖昧之事總之朝廷用人行政一秉大公所言實者自應補闕拾遺平心論事毋得任意揣測信口捏造蹈誣罔之咎此次陳秉和覆奏理屈詞窮本應予以處分姑且從寬陳秉和著傳旨嚴行申飭○己巳劉坤一奏臣疊奉 上諭飭令各機器局酌定快鎗快礮新式鎗子礮彈分量互相討論如式製造並飭就原有局廠切實擴充各等因欽此嗣又欽奉 諭旨行軍利器以後膛快礮小口徑毛瑟鎗爲最現時南北洋及湖北各省均設機器製造等局著該督撫就地籌款移緩就急督飭局員認真考求迅卽製造等因欽此仰見 皇太后 皇上修明武備於以建威銷萌莫名欽服方今強鄰環伺伏莽潛滋非整飭戎行無以立自強之本非講求利器無以操制勝之權現值各軍改練洋操是製造鎗礮子彈俱應一律如式縱分途仿製工作可混參差卽衆軍合操心志亦能專壹疊經臣恪遵 聖諭分飭金陵上海兩機器局欽遵辦理惟查各省設局自行製造初皆博收約取近益推陳出新舊式軍械均已停造如金陵局造之後膛機鎗上海局造之快利新鎗各軍均稱利用大小礮位亦皆合宜第金陵一局本專供南北洋各軍之用機器

無多經費有限凡轉輸京畿運鄰省及南北常年操防大批軍火胥由上海機器局製造供用近來奉撥之軍械益夥所用之工料倍增嗣後添設鍊鋼藥無煙藥三廠規模粗備講求漸精前辦局員請撥專款六十萬兩購辦鎗礮等機原爲擴充製造地步只因款巨難籌議而未購茲以快利鎗機實略異已就原有鎗機酌量配換添購各項器械改造小口徑毛瑟鎗及製造彈機一部又該局之十二磅子六磅子兩項快礮與北洋之七生的半快礮五十七密里快礮核其口徑子彈相同本係常川自造惟查北洋之七生的快礮湖北之三生七快礮與南洋所購之六生的快礮犀利便捷爲陸軍所必需均應鑄備亦應預有之機酌量配換並添購鍊鋼機鑄等件共計價銀三十八萬餘兩由此專精仿造則鎗礮子彈與津局鄂廠均係一律自免叢雜之弊特是製造經費以二成洋稅爲大宗復因鍊鋼造藥事屬創辦所費不貲勻撥仰蒙 飭部核准在於江海關稅撥項下每年撥銀二十萬兩作爲三廠常費第稅收盈絀無恆常費欠解甚巨若非另請指撥的款恐致機價兩懸疊據該局詳請咨前來 臣查製造鎗礮以歸一律實屬自強要圖勢難延緩該局併就原撥之二成洋稅三廠常費騰挪估計添造鎗礮等機辦理尙屬撙節惟江海關撥款浩繁收不敷放此項三廠常費關局均請改撥已經據詳咨部有案稅釐俱屬正項製造亦關要需既難挹彼注茲惟有仰懇 天恩飭部另籌的款如數撥補俾資製造而厚儲胥下戶部

妥議具奏○劉坤一等奏等承准軍機大臣字寄奉 上諭御史徐士佳奏淮徐兩屬連被水災邳州一帶匪徒乘機滋事請飭設法撲滅等語著劉坤一德馨將邳州滋事匪徒趕緊捕治毋任滋蔓其各州縣被災地方如有應行蠲緩錢糧之處並著迅速查明具奏等因欽此當經轉行欽遵辦理伏查本年十月間邳州叻鹿山地方有匪首孟繼緒聚眾豎旗起事該州知州孔祥霖會同山東蘭山郯城二縣派勇往捕該匪行蹤詭秘飄忽靡常當經徐州道桂嵩慶飭派都司李輔勳督率馬勇馳往會剿二十二日行抵邳州即於次早偕同知州孔祥霖馳至相距叻鹿山數里之丁灘遙見羣匪數十人手持鎗械出莊逃走李輔勳當先督勇追捕該匪膽敢放鎗拒捕勢甚兇悍李輔勳奮勇率隊開鎗還擊先後轟傷生擒兩匪陣斃兩匪始各逃散隨將生擒匪犯由州提訊據供匪首孟繼緒在叻鹿山豎旗起事有劉振鐸等皆僞頭目手下各有十數人及二三十人不等並派人赴山東暨西鄉對碼二斤二兩五錢等語訊畢旋即因傷斃命按賊中隱語每碼一錢計眾十人約共所統匪數已不少不可不嚴為防禦後經多撥馬隊並電商統帶金軍前徐州鎮總兵陳鳳樓一體派隊前往扼要堵剿以期及早撲滅十二月初九日經邳州知州孔祥霖督帶勇練往捕在鄉家集與匪相遇格殺十三名生擒頭目劉振鐸等八名餘黨擊散並聞匪首孟繼緒已在山東蘭山縣劉家莊拿獲因受重傷解至中途斃命現在邳州地方一律安堵稟由徐

州道桂嵩慶稟報前來臣查該匪首孟繼緒等膽敢乘地方荒歉之時聚眾豎旗起事實屬不法已極該道聞信後立派營隊馳往會剿擒斬數匪併經該州督率勇練擒獲要目多名地方賴以安靖辦理尙爲迅速惟孟繼緒爲巨魁首惡究竟是否確已傷斃曾否據蘭山縣驗訊明確除批飭趕緊移查明確馳報查考併飭令邳州先將擒獲之頭目劉振鐸等提訊確供稟請懲辦外謹附片覆陳報聞○癸酉以劉鴻璣爲禮部右侍郎○諭鄧華熙奏特參縱盜姦奸之劣員請旨革職示懲一摺捐升湖北試用直隸州知州前署渦陽縣知縣桑鼎諱置刦案致長盜風喪權貽患此次土匪之亂實自該員釀成未便因其已經改省稍事寬容湖北試用直隸州知州桑鼎著卽行革職以示懲儆該部知道○甲戌命張俊爲榮祿全軍翼長○丙子雪○裕長奏奉到正月十八日寄諭現在渦匪已據報肅清藍斯明一軍是否應令凱撤回直著查明迅速覆奏等因欽此遵查布置防軍各路情形已詳細陳明惟奴才上年奏請籌撥餉項添募四營奉旨允准遵卽機行記名提督尹嘉賓招募豫定左右兩營業已如數招募精壯炮日點驗成軍至汝寧營參將韓立本所募豫勝左右兩營因其服官汝寧有年久孚眾望當卽飭往該處就近招募成軍卽在上蔡縣及周家口等處駐劄兼防陳州汝寧兩府邊境此四營專習操鎗因豫省偏地沙磧不利礮車行走汝寧一帶善用背鎗命中擊遠較爲靈便實爲制敵之利器但操練尙須時日現擬將楚

練二營仍留駐新蔡縣一帶暫資彈壓俟豫勝等營訓練精熟再行奏明將楚練二營歸藍斯明帶回直隸正定鎮本任理合陳明仰 旨如所請行○戊寅諭御史孫朝華奏請飭各省認真籌辦積穀一事迭經諭令各直省切實籌辦現在已陸續覆陳惟被災之區該督撫輒稱豐歲再行舉辦地方官藉端支吾深恐永無實效況積穀與平糶相輔而行出陳易新爲倉儲要義現在被災處所正當及時平糶使民無乏食之虞一俟穀價稍平卽行買足還倉方爲有備無患著各督撫轉飭所屬將積穀平糶事宜一體籌辦毋得空言塞責視爲具文○諭黃槐森奏委員採辦機器侵吞鉅款據實糾追一摺據稱已故廣西試用同知董嗣鏞前經委令購買機器發給銀五萬兩除用銀三萬餘兩外其餘款項未經繳回訪聞曾爲其子董福嗣報捐鹽大使指分雲南試用顯係侵吞官款等語已故廣西試用同知董嗣鏞著卽行革職並著四川總督將該革員原籍成都縣家產查抄備抵如有爲其子報捐鹽大使分發雲南情事著該部查明一併革職行知該省提案監追以重公款該部知道

光緒一百五十二

臣朱壽朋敷編

臣汪錫增恭校

二月己卯朔諭兵部奏本年輪應查閱直隸等省營伍一摺直隸即派裕祿山西派胡聘之陝西即派魏光燾四川即派奎俊甘肅即派陶模認真查閱各省營伍關繫緊要前經迭諭各將軍督撫汰弱留強加意訓練原期一兵得一兵之用該督撫等務當切實簡校如有技藝生疎軍實不齊等弊即將該管將弁據實嚴參不得稍涉瞻徇以副朝廷整飭戎行至意○張汝梅奏准總理各國事務衙門咨光緒二十四年八月二十八日會同吏部具奏登州府同知移駐威海作爲海防同知要缺援照奉天營口海防同知之例辦理中外交涉事件其應作爲何項要缺及一切未盡事宜再由該撫體察情形辦理一摺本日奉 硃批依議欽此欽遵咨行到 臣當經體察情形飭司籌議辦理伏查山東威海衛在登州府文登縣西北一百里地處偏隅曾設威海司巡檢一員自海疆多事以來交涉頓繁分派員紳專司其事現又租與英國屯泊兵輪洋務倍繁於前非移駐職分稍大之員不足以資控制查吏部則例內載奉天營口地方添設同知一員專司稽察彈壓作海防要缺同知由該府尹等於奉天所屬人員酌量升調題補照例

辦理該同知年限俸滿別無違礙處分由該府尹等出具考語送部引見後歸部遇有知府缺出不論俸項雙單月均予卽升不積正班之缺仍在任候升時加體察如人地未宜辦理不替卽行分別參辦撤回改補等語今登州府簡缺同知既經總理各國事務衙門會同吏部奏奉諭旨允准移駐威海改爲要缺應請援照營口同知成例作爲外調海防要缺同知由外酌量升調題補優予升途如人地未宜辦理不替卽行分別撤回改補該同知專司海防水利稽察彈壓遇有中外交涉事件隨時稟承巡撫關道妥籌辦理以期內治外交兩有裨益其餘命盜錢糧戶婚田產與夫一切詞訟案件仍歸文登縣審理以符舊制至應支俸工養廉等項均可照舊支領毋庸另議增添同知關防篆文無分繁簡亦可毋庸鑄換已飭現任登州府同知吉慶先行移駐威海就地經營衙署如何安設及一切未盡事宜仍飭妥議籌辦並察看該員吉慶能否勝任再行分別去留更調用昭慎重不敢稍涉遷就惟改缺例應繁簡互換東省繁缺同知現均無可更改且此次改缺係奉旨允准之案與尋常改缺不同自應免其與他缺更換抵補下部議奏○辛巳諭山東巡撫張汝梅著開缺聽候查辦○以毓賢爲山東巡撫○毓賢奏奴才自蒞署任後查詢江甯八旗現在頭甲大小甲兵六百餘名係江甯原來駐防兵丁之後其二甲三甲兵丁將及二千名係由荊州先後調來統計尚缺四五兩甲共約一千多名不符早年原額之數惟察看各兵丁

及其家口多屬藍纓異常情形竊推原其故皆因月領餉銀食用之外並無盈餘加以食指繁多毫無恆產接濟是以多同乞丐溯查金陵地方咸豐三年被粵匪攻陷旗營官兵三萬餘人無不血戰捐軀雖婦女孺子亦能守城殉節間有服官隨任在外者幸免於難遭禍之慘甲於天下其所存之六百餘名盡屬忠魂後裔追思往事莫不傷懷查得駐寧八旗早年自置八卦洲地畝每年可收租銀一萬兩有零各旗分用稍資敷衍辦公正項亦出於此自前將軍豐紳到任以來不知潔已奉公以缺苦爲口實每將白己私用影射開支賸倒多端任意浮冒每至年終清算則或稍有餘項所分無幾眾口嗷嗷何濟於事夫練兵之道必先令其溫飽而後能用其精力既充斯體氣漸壯然後廢以紀律勤以訓練方成勁旅今既如此成何軍政若不極力整頓何以收士馬騰之效奴才體察兵艱日夜籌策先將到任後所有供給概行裁革所用一切自行發價嗣後署內支銷不准在八卦洲地租內動用分毫署外各旗必不可少之用項或裁或減認真經理以期稍蘇兵困倘有把持侵蝕等弊一經查出卽據實糾參絕不稍徇情面而負初心現已飭查八旗大小官兵內及閒散中究有年少精壯者各若干人將來如何籌畫再行籲懇天恩得旨辦理甚是嗣後卽著崇書認真經理毋蹈故轍○劉坤一奏欽奉電傳上諭中國創建水師歷有年所惟是制勝之道首在得人欲求堪任將領之才必以學堂爲根本應如何增設學額添製練

船講求駕駛諳習風濤以備異日增購戰艦可期統帶得力著南北洋大臣沿海各將軍督撫一體實力籌辦妥議具奏等因欽此仰見 聖主力圖自強固國育才之至意欽服莫名 臣維各國爭雄海上船堅礮利日異月新水師規模較前迴勝南洋舟艦未備欸項維艱欲增購戰船成一大枝水師非外省財力所能猝辦惟有就原設學堂增設學額添製練船俾各認真講習藉收拔十得五之效當飭該堂總辦道員柯銘欽遵辦理頃據詳稱江南水師學堂創立之始原係駕駛管輪兩門各分三班招考生徒分別課授自英法語文而外凡句股算術幾何代數平弧三角重學微積以及中西海道星辰部位駕駛御風測量繪圖諸法帆纜鎗礮輪機大要皆當次第研求堂課畢業派登練船俾周覽山海形勢沙礮風濤吏番巡歷以練膽識祇以各生學成登進不廣學額裁復無恆上年冬間又因經費奇絀將三班學生四十名暨裁撤咨部有案現值 國家整軍經武廣儲將才以學堂爲水師之根本遵將原裁三班學生四十名暨教習員司人等招募添設一切薪費仍照前額原數開支於十月初一日考取入堂照常肄業至巡練之船現有寶泰一艘疊經督帶駕駛管輪頭班學生周歷海島諳習風濤再派赴各兵輪循環補用卽帶二班學生先後登船約計兩年船課均可畢業似此循環督練暫可不另添船等情前來當飭查照向章斟酌定額督率教習人等認真訓迪就其造詣之深淺以爲升降之等差尤當中西並肆時以經史大義輪

機新法與之朝夕講求俾咸知明恥教戰之義因時制變之方異日馳驅海上庶足備 國家干城之選
得 旨知道了卽著督飭柯銘等認真訓練毋得始勤終怠致成具文○壬午以錫良爲湖南布政使調
文光爲湖南按察使以張曾文爲四川按察使○以崇善爲江甯將軍調綽哈爾爲錦州副都統以奇克
伸布爲福州副都統○諭前據署江甯將軍毓賢奏江甯八旗自置八卦洲地畝每年收租萬餘兩原爲
辦公欸項前任將軍每將自己私用任意開支以致兵丁苦累現經毓賢竭力整頓自到任後所有供給
概行裁革嗣後署內支銷不准在地租內動用該署將軍潔己奉公洵堪嘉尚各省八旗駐防該管將軍
若皆能如此認真整頓何至餉項虛糜兵不宿飽嗣後務當督飭協佐等員力裁浮費毋得因仍故習藉
口於公費不敷任意賒削因念各省督撫恐亦不免有州縣供給之虞州縣藉口辦差苦累非挪移公項
卽科派民間其或 督撫受其挾持於州縣陋規名目不肯運予裁革殊非核實辦公之道嗣後各省將軍
督撫皆當整躬率屬廉儉自持不准絲毫累及所屬其局所辦公經費亦不得任意浮冒影射支銷庶幾
大法小廉吏治蒸蒸日上朝廷有厚望焉○李鴻章任道鎔張汝梅奏山東黃河自咸豐間銅瓦廂改道
以來光緒八年後潰溢屢見遂普築兩岸大堤尺寸初不高寬乃民間先就河涯築有小埝隨灣就曲緊
逼黃流又因河灘淤高埝自加增官民相率守埝大堤日久失修每遇汛漲埝決堤亦隨決此歷年失事

病根也古今言治河者惟讓地於水實爲上策其次則惟有展寬河身今兩岸大堤相距有五六里至八九里不等應卽就此兩堤加培高厚永爲修守似不失爲中策第兩岸之中先有聚堤守埵之屬小民安土重遷不肯遠去非可旦夕議定暫宜照舊守埵徐圖更張至下口入海尾閘尤關全局現在水行綫網口入海去路偏向東南形勢不順不能築堤既無以束水攻沙故不免下壅上潰今勘得鐵門關故道向有八十餘里可通海口較綫網口韓家垣兩路爲順工亦較省然建攔河大壩一座挑深引河三十餘里修築兩岸大堤八十餘里所需工費頗鉅惟是下口不治全河皆病今欲大加整頓不得不從長計議核實勘估其餘如添修費以固根本設減壩以洩異漲以及設堡夫辦豁免設驢汛等事雖有先後緩急之分實爲將來不可少之舉大約此項鉅工五六年可期辦竣略如從前南河規模但需南河三四年修費則一切法制整然畢具而山東無落清敵藪之累收效亦較爲速大李鴻章又上所籌十策及比國工程師盧法爾擬具治河新法並奏遷民修堤之舉竊堪委曲斷難剋期告成而頻年決溢河底積淤如再節次決口不特一切工程種種棘手兩岸災民何忍再罹昏墊爲今之計惟有擇要加修兩岸堤埵疏通海口尾閘既爲目前救急善策亦卽治標以待治本之要圖 上諭前因山東黃河工程緊要特派大學士李鴻章馳往山東會同任道鎔張汝梅周歷勘妥議具奏茲據李鴻章等聯銜復奏並會議黃河大治

切實辦法及救急辦法詳議章程繪圖呈覽各摺片事關山東全省河防工程尤關重大著軍機大臣大學士大部九卿翰詹科道一體會議奏摺二件一件單開五件併發○總理各國事務衙門奏定地方官與教中往來事宜五條其文曰天主教在中國各省地方建立教堂久奉 國家允准奉行茲因欲使民教相安便於保護起見議定地方接待教士事宜數條如下 一分別教中品秩如主教其品位既與督撫相同應准其請見總督巡撫倘主教有事回國或因病出缺護理主教印務之司鐸亦准其請見督撫攝位司鐸大司鐸准其請見司道其餘司鐸准其請見府廳州縣各官亦按照品秩以禮相待 一主教應將所派專與官長交涉辦事各司鐸名姓教堂住址開單報明督撫以便飭屬照章接待凡請見地方官及專派辦事之各司鐸均應西人充當或有事西司鐸未能熟悉華語可暫令華司鐸幫同傳譯 一主教居住外府無事自不必遠赴省城請見督撫遇有新督撫蒞任主教更換新到或值年節均准其向督撫修書或寄遞名刺致禮督撫如無答覆至各司鐸更換新到應持有主教函據方可照品請見司道府廳州縣等官 一各省出有重要教案所在之主教司鐸等須轉請教皇專託保護天主教之國之公使或領事官向總理各國事務衙門或地方官辦理了結可先徑向地方官商辦了結以免多費周折該地方官並主教司鐸等員來商應迅速和衷商辦擬結 一地方官應隨時曉諭約束所在平民務與

教民一視同心不得挾嫌構讐主教司鐸等亦應勸誡教衆專心嚮善以保教中聲名俾令平民悅服如民教涉訟地方官務須持平審辦教士亦不干預租護以期教民相安得 旨如所議行○諭前因已故將軍豐紳屢立戰功當經降旨賜卹予諡並於立功省分建立專祠以示優異茲據御史彭述奏稱豐紳前在江甯將軍任內賤削浮冒罔恤兵艱請將卹典量予裁抑等語前江甯將軍豐紳著撤去建立專祠並毋庸予諡○癸未諭前據興廉奏呼圖克圖報効銀兩請賞能繳各項等語當經諭令理藩院檢查成案茲據該衙門查明覆奏哲布尊丹呼圖克圖於昭信股票案內報効鉅款實屬深明大義著賞給龍緞一柄龍緞靠被一分以示優異貝子銜巴特瑪車林且著加恩賞換雙眼花翎○甲申諭前因寬岡奏查辦西陵守護大臣毓慶等參款未能詳晰當經諭令再行確查具奏茲據奏稱遵旨將駁查各條並原參各節覆審明確詳晰擬據實覆陳一摺此案經該大學士兩次委員密查並奏准咨行原參之泰甯鎮總兵祥霖逐一指實聲覆再四推求毫無遁飾因由貝子毓慶縱容家人並信任劣員 陵寢重要之地毫無整頓實屬有負委任奉恩鎮國公全榮不能約束家人屬員弊混亦未覺察不勝守護之任毓慶全榮均著開去守護差使交宗人府分別議處翼長茂勝素有心疾並不時赴府攬奏文牘多出其手防禦岳嵐常在府中回事處坐談俱屬不合該二員業經撤去兼行差使均著交部議處兼管牛羊圈之禮

部員外郎錫拉藻奎秀聯秀盤查不力著一併交部議處防禦肅立秀明於兵丁借餉修房一案意存侵蝕辦公不實均著卽行革職逸犯徐岳泉情節較重仍著該衙門嚴拿務獲送部治罪其訊係無干及該總兵未能指實各節均著毋庸置議餘著照所議辦理至該大學士前奏擬定牛羊圈稽查工程並借餉修房酌予限制各事宜均著照所議行該衙門知道○諭前因積穀保甲團練等事均爲國計民生所係迭經諭令各省認真籌辦其已經定議覆奏者務當力踐其言事事皆求實際辦有成效仍隨時奏聞尙未定議具奏者卽著各該督撫各就地方情形妥定切實章程迅卽奏明辦理勿再延緩朝廷念切民依要在實事求是言之匪艱行之惟艱各疆臣身膺重寄必當共體此意也將此通諭知之○丙戌鄧華熙劉坤一裕長奏上年十一月間安徽渦陽土匪劉疋癸牛世修等倡亂起事勢甚披猖臣坤一臣華熙先後接據壽州知州瞿世琬電稟當經分電徐州皖北鎮道派兵馳往相機剿辦並飭原駐亳州之威靖營統領副將張雲松飛飭所部迅往兜拿一面電知臣裕長轉飭師德鎮嚴防永城一路並協力會剿以期速了而免竄擾壽春鎮總兵郭寶昌鳳潁六泗道李光久相距較近聞信後卽分派參將李桂馨帶皖北馬隊赴宿州參將王鳳台帶卓勝防營步隊赴渦陽郭寶昌復自壽州親率提督高得勝都司杜椿林等分帶練軍防勇前進並由臣華熙添派記名提督韓大武督率練軍安定左右兩營及馬隊礮隊又飭

游擊陸恩甲帶精健前營分由安慶蕪湖拔隊星夜馳赴援應徐州鎮總兵劉青煦徐州道桂嵩慶聞信先後派游擊熊長春及哨弁高文陞外委歐陽松均各率馬隊分赴臨渙集濉溪口駐紮劉青煦復親率營帶徐防馬隊右營參將黃青雲等抽調徐防馬步隊前進並由重坤一添調銘軍隊百騎元字步隊二百名飭派都司陳凱彭壽長營帶隨同劉青煦前往臨渙助剿臣裕長亦電令歸德鎮總兵武朝陽親帶得力弁兵迅往永城堵禦並先後飭派總兵楊鴻禮督帶馬步兩營會同協剿副將朱東成帶隊赴歸德駐紮策應該鎮等三面進兵縱橫掃盪渠魁抄首地方救平業經臣等隨時電奏在案伏查此次各匪首多係積年漏網之盜土人謂之桿子頭平時專以搶劫爲生在渦蒙毫宿及徐州歸德三省交界處所此輩彼竄蹤跡詭秘異常近以地方荒歉遂以爲時會可乘濟作逆謀揭竿而起首逆劉元勝即劉立棟最爲兇悍又有牛世修卽牛汝秀家在草市與已故甘肅寧夏鎮總兵牛世韓爲同族知其家藏有鎗彈子彈遂於十一月二十六日先搶該故總兵家軍械繼搶鹽棧銀錢二十七日掠石弓山二十八日攻龍山營署該營游擊壽右營都司何師程先期與右軍守備蔡德榮赴壽春鎮署稟商冬防事宜署左軍守備李鴻標知有匪起繼往壽州請兵千總吳有謀率兵抵禦身受重傷外委吳玉階隊目邵廷傑李燕降及炸長張德馨同時戰歿兵丁傷亡大半民團死者百餘人何師程等聞警馳回該營先於二十九日失

陷軍殺糧餉文卷等件被擄一空當匪衆初起時僅二三百人劉疙瘩由丹城南竄賊目魏得武余盛五等互相勾結不數日間衆逾二千賊馬亦百餘騎恃有鎗械利器頑民相率附和窮黎被脅愈裏愈多其攻渦陽縣城也該縣知縣歐陽鶴自募勇二百名紳董王開朗馬驥才等招集練丁協同固守威靖營統領張雲松在亳州聞報派守備韓大坤帶馬隊三十名於二十八日先到自率步隊百名於二十九日繼至何師程等亦卽馳來救援內外夾擊立解城圍賊遂踞白馬丹城等處爲巢穴分路竄擾北犯河南永城縣界嗣至山東與大刀匪合夥由越章溝集犯馬村橋劉鶴臣鎮兵到仍折而南撲白龍廟其西路一股於十二月初一日突撲護門集該處巡檢宋超標總兵曾率汛兵民團拒敵威靖營勇應之殺賊二百餘人生擒三四十人賊敗遁去初三日復糾大股來犯奸民內訌該集遂被佔踞其時渦河南北匪徒乘機響應孫凌志起於義門集燕懷軍起於蕪家牌坊邵大發韓懷玉等起於鄭家集統計醜類不下二萬餘人大致分南北兩股附近村鎮相繼不守焚殺奔馳幾遍渦陽全境宿州在渦陽之東臨渙集與曹市相接該州盟世境得信後募勇兵三百名會同宿州營游擊譚新益威靖右營游擊陳懷德各率兵勇並由在籍總兵王心忠親率練丁併力嚴防更番巡哨匪衆屢次侵犯皆不得逞而回李桂馨率馬隊迅至會合陳懷德於十二月初七日由臨渙抵龍山接戰殺賊百餘得馬十一匹張雲松亦在張老莊與賊

開仗獲勝初八日武朝聘率隊在燕家牌坊東南程家樓與匪首王毛拚接仗賊眾千餘營官孔昭魁張連山率馬隊左右包抄黃翼三陳錫率步隊直搗中堅自午至未賊無懈志幸我軍快礮得力賊少卻各隊乘機猛進立將王毛拚鎗斃並斬殺五百餘名生擒二百餘名奪獲賊械三百餘件餘匪逃竄該鎮兼程前進首挫兇鋒最爲奮勉是日劉青照率所部各營隊行抵臨渙集與該處紳士直隸委用道袁大化詢商一切初九日叩刻親督隊伍由臨渙向張家圩子道竹欄等處進剿袁大化亦來助戰行十餘里匪首劉疙瘩率悍黨馬步數千蜂擁而來劉青照卽分兵三路飭營官陳凱彭壽長爲左路營官熊長春哨官李金芝爲右路縣丞劉燾附生劉榮督隊進攻自率營官黃青雲訓導鄧嘉緝附生姚衡熙等居中策應匪用結帶陣接戰鎗子密如雨落陳凱熊長春黃青雲彭壽長李金芝及幫帶劉國湘哨官劉炳章徐增祥等皆奮不顧身帶隊衝鋒用連環排鎗轟擊匪亦冒死抗拒血戰二三時之久賊勢大敗奔竄橫屍遍野我軍帶傷者亦數十人跟蹤追剿克復石弓山卽晚收隊繳剿髮辮計殺匪五百二十三人生擒七十五人訊供有匪首劉醜卽劉燾連業已陣斃隨將被虜商稚者數人省釋餘均正法是役也奪獲火藥車十三輛鉛丸百餘斤擄獲纜鎗甚多旗幟七十餘面馬牛騾百餘匹聲威大振賊膽已寒李桂麟亦與王鳳台韓大坤何師程等在張連莊殺賊七十餘級奪獲鎗械旗幟多件哨官儘先千總李得才陣亡威

靖馬勇受傷者九名先是郭寶昌親率馬步隊次過南蒙城縣屬之小湖集地當四達消息靈通深知蒙城各圩多與匪通遂於初八親督率練兩哨馳往鹿家圩猝不及料備於兵威當將爲首之鹿小賁送出訊明正法傳集附近各圩諭以洗心革面辦團禦賊概免深究賊首劉成擁衆王家寨抗違不服立即派隊往捕擒獲斬梟由是遠近各圩帖然反正不敢再懷異志矣後路已清維時劉青照已在道竹橋大獲勝仗武朝聘亦有燕家牌坊之捷賊勢漸衰正擬三處進攻邵大發一股忽由過南竄入張村鋪聲言將入鳳臺阜陽等處郭寶昌飛飭高得勝杜椿林各率百餘人會同李桂馨追剿而自移紮西陽集以防南北合股初十日劉青照率隊進攻青町集西之段家營該匪死黨皆聚於此馬步約六七千人自經道竹橋之敗意在死戰布列十餘陣後靠大莊爲接濟前面兩村中空里餘以防我軍抄突頗得地勢左右莊均有埋伏劉青照仍分中左右三路進擊匪畏鎗彈改結帶陣抽繞頭蛇行逼進志在短兵相接陳凱熊長春黃青雲彭壽長等帶隊挺身猛撲劉青照揮軍從左右旁側出賊以兩面受鎗所伏馬賊齊起衝突欲圍包裹劉青照分馬步隊截擊匪始大敗奔潰我軍奮勇跟追直至龍山立時克復陣斃賊目七八人餘匪三百餘人生擒二十三人奪獲旗幟鎗砲銅號海螺多件牛馬多匹勇丁陣亡三人受傷六十餘人劉痘瘡窮感遠遁同日郭寶昌所派營官王鳳台復大勝於焦家樓殺賊百餘名生擒五名武朝聘亦

由白龍廟進攻三路兇擊賊遂不支十二日首逆劉疙瘡逃至青町集何師程率勇圍拿立時成擒供認爲總盟主不諱高得勝杜椿林李桂馨復於程家莊陣傷邵大發因而就獲供認爲僞仁義王均卽正法餘黨潰散大致平定韓大武所部馬隊營官總兵徐全等行抵關嶺佛鎮等處迎剿南竄股匪追殺至王市孫家等集四十餘里斃賊甚多另股白旗首燕懷軍卽燕鴻勳糾集千人自稱堂主在義門楚店等集敗於官軍遂由尹家溝渡河向西南逃走復經土鳳台高得勝李桂馨等乘勝追奔三四十里殲賊數百人截獲軍械馬匹無算生擒燕懷軍亦卽正法魏得成先爲劉疙瘡將戕害孫凌志則爲王鳳台陣斬小花旗匪首馬啟芳劉石匪目王秀明王鳳文王金標王連劉會王在天均爲劉青照拿獲馮匪軍師王三邪子爲永城營參將陳錫拿獲匪首張孤狸潘黑兒爲豫正軍副將朱東成拿獲至是滿南北股匪皆肅清而亳州泥台店又有匪首韓士林聚眾踵起旗書大魯王字標旋爲總兵楊鴻禮設計誘解送亳州訊明電票飭卽正法仍有劉疙瘡等餘黨分竄亳州東南邊境三岔口成福寨等處是時韓大武前隊已抵渦陽張雲松帶隊回亳州防堵十三日至三岔口北丁固寺匪徒尚有千人賊馬數十騎當卽排隊奮擊傷賊數十並奪得賊騎匪械餘眾逃散十四日又在立法寺率勇會同與賊接戰追至孫家營陣斬多名擒獲匪目劉老么袁世真及羽黨劉運蘇王田等解州訊辦劉青照郭寶昌武朝聘至臨渙會同審後

事宜營隊四出搜拿餘黨並無賊股於是留韓大武練軍兩營陸恩甲精健一營並添步勇兩營共六百名馬隊一起八十名會同原駐皖北練防各營分駐渦蒙亳太等處嚴密巡緝復由徐州鎮酌留馬隊扼紮宿州地界聯絡聲援以資鎮懾劉古鼎郭寶昌武朝聘各回本鎮一面由坤一軍華熙將續調之衛字三旗皖南二營分別調回原防惟首逆牛世修即牛汝秀在逃未獲營經懸立重賞飭拿於本年正月十四日在略皖集擒獲解交蒙城縣訊明批飭正法此三省官軍合力剿辦之實在情形也當匪勢力熾之日兵力注重於渦陽鄰近各州縣惟賴團練以自固蒙城本駐勇無多十二月初八日匪首閻好文等率黨七八百人欲南犯鳳臺圍集蒙城董家圩經劉家集外委李維桐約集鄰莊練家營力截殺陣斬閻好文餘匪卻走初九初十等日藍旗賊首楊懷玉與邵大發率眾攻董家集署蒙城縣知縣曾光照戒備在先會同在籍總兵李南華候補副將馬玉書都司趙大有陳樹楨等親督團練並調二十八集練丁數千人在董家集陳家莊王氏集等處與匪連日鏖戰陣斃千餘人生擒楊懷玉及匪目馬岐山劉長發牛士素李大堂等十名奪獲大礮洋鎗子藥馬匹甚多武童武文思精習飛鎗衝鋒勇往尤為得力團勇僅傷數十人外委李維桐之弟六品軍功李維楷陣亡其西竄股匪由張村鋪入阜陽王市集分擾馮家圩劉家店等處原駐練軍先經抽調至渦阜陽縣知縣黃家傑募勇未齊於初九日調集各鄉團丁六百

餘人會同守備徐振清迎頭堵剿斃賊數百名奪得旗械多件追趕敗賊急渡淝河而遁又經渦陽圍練
擊斃二百餘人十一日復有賊至順河集亦被圍丁擊退追殺百餘人殘賊零落遁入亳州邊界高公廟
一帶十二日圍寨又在路家圩楊家寨等處敗匪斬首二百餘級民人陣亡一人受傷十餘人亳州駐防
威靖營勇盡數調赴前敵城關地面空虛游匪勢將竊發署亳州知州孫鳴皋營都司劉占榮會同諸
假在籍新授廣西右江鎮總兵李永芳前廣東潮州鎮總兵劉世俊招集舊部添募團勇三百名其餘城
鄉紳商集資共募六百五十名晝夜巡邏防範周密又挑選精壯回民與河下商船舉辦水練一團為護
城接應之計城守既固李永芳劉世俊於十二月初七初九等日馳赴東鄉十九里溝立橋集張信溜等
堡緝拿聚眾滋擾游匪當場格斃四名擒獲首夥六名內有羅亭潮一犯係與魯士林同謀起事十三十
四等日又會合威靖營在忠心集龍得寺等處截擊竄匪殺斃三百餘名生擒十餘名奪得車馬刀械多
件並在賊目懷中搜出盟帖名單先後送交該州訊供懲辦該州在和集堡離城較遠董家寨有賊踞擾
適署太和縣知縣袁孝昌巡至邊界聯絡洪山等堡鄉團初九日與匪接仗獲勝殺賊數十人獲賊鎗械
多件當將該寨收復宿州邊境之三義集袁家店等處竄入匪跡經該州壯勇民團隨時打退其五鋪三
鋪丁家圩等處有匪勾結思逞分派勇役捕拿亦即解散分防濉溪口署鳳翔同知程鑑分汛把總李修

動偵有呂家樓匪目呂安等在小灘城東聚二三百人將欲竊動於十二月十三日帶兵率團往捕當獲呂安呂鳳及羽黨十五人餘眾逃散當時復另有薛五徐鳴燕一股在河南夏邑江蘇碭山接界地聚眾起事該處距渦宿較近深恐勾結爲患經碭山縣陳誠會營督練馳赴張莊迎擊擒獲首匪徐鳴燕等十一名格斃四名並經夏邑縣鄉團將匪目丁浩然楊春華等擊斃餘黨悉散此各屬官紳團練隨地剿辦之實在情形也其餘客軍則有山東候補知府董受祺辦理宿渦鹽務兼帶巡營會同游擊孫旗明已革副將徐天慶由臨渙開赴石弓山新興集等處會合協剿機獲勝仗擒斬百數十人並獲賊械多件亦屬奮勇可嘉臣等覆查渦陽亳州一帶向有捻匪老巢此次劉疇齋牛世修等乘年歲荒歉之時號召黨徒倉卒起事決旬之內蟻附至一萬餘人四出焚劫脅陷龍山義門等鎮集數十餘處匪蹤日熾飄忽靡常皖北各州縣以及毗連之江蘇徐州河南歸德等屬處處震驚紛紛告急若非趕緊撲滅蔓延橫潰爲患何可勝言臣等聞警後立即電飭各該鎮道迅速派兵捕治並調撥營隊馳往援應臣坤一臣華熙復徧張示諭曉以大義擒渠散從一面加撥款項派員放賑以免饑民迫而從匪仰蒙 朝廷指授機宜並賴諸將踴躍用命郭寶昌由南路進劉青煦由東路進武朝聘由北路進三面圍剿十盪十決而張雲松威靖一軍首先抵渦力解城圍並與各營管帶官李桂馨王鳳台等往來游擊力挫兇鋒各屬團練亦復異

常出力未及旬日地方一律肅清首要各犯次第授首蘇豫兩省防堵嚴密未容該匪攔入洵足以紓宸慮而定人心各營正值裁減之餘兵力較單劉青照郭寶昌武朝聘等皆調撥不滿千人星夜赴機以少勝衆實屬勦勞懋著調度有方徐州鎮總兵劉青照可否 賞加頭品頂戴壽春鎮總兵郭寶昌歸德鎮總兵武朝聘可否 賞給翎管搬指荷包等件以示優異伏候 聖裁徐州道桂嵩慶鳳潁六河道調補蘇松太道李光久籌備後路供支無缺並擬請 交部從優議敘其餘出力各員容臣等另行查明分別擇尤請獎以示鼓勵署龍山營游擊何師程本營失陷咎無可辭惟據報公出在先繼卽隨營剿匪力解渦陽城圍又擒獲首逆劉疙瘩其功亦可掩罪先經 臣坤一批飭摘去頂戴應請免其置議著龍山左軍守備李鴻標有營守錢糧之責雖據稱先出請兵中途聞警折回究有應得之答應請 旨卽行革職左營千總吳有謀身受重傷義門司巡檢宋超分汛把總孫傳曾率團守寨殺賊甚多新義集把總沈錫嵩曹市集外委集承忠石馬山額外劉煥章無案可守所轄兵丁僅止數人情均可原並已分別摘頂撤任以示懲儆渦陽縣前後任正署知縣陳清源歐陽福縱盜養奸致釀巨患已先查明參辦奉 旨革職永不敘用又前署該縣知縣桑福罔恤民艱廢弛捕務亦經 臣華熙續行奏參千總李得才外委吳玉階隊目邵廷傑李義隆及隊長張得馨六品軍功李維楷力戰捐軀殊堪憫惻應請 勅部分別從優議卹

此外剿賊殞身之兵勇另行查明覈辦至匪目余盛五薛五二犯逃匿稽誅已通飭文武各員懸賞緝
務獲懲辦以絕根株惟是涇陽等處被災被匪十室九空恤難賑饑實爲善後第一要義迭經 華熙飭
司籌撥銀十萬兩並由 臣坤一協撥銀十萬兩解院分派賑幹之員馳往趕速查放一面分電各省廣募
賑捐俾資接濟容由 臣華熙將辦理賑撫情形另行具奏總當殫竭心力妥爲籌辦以仰副 聖主軫念
民瘼有加無已之至意 上諭劉坤一等奏涇陽縣土匪肅清一摺上年十一月間安徽涇陽土匪牛世
修等倉卒起事界連三省最近震動業經劉坤一等派兵剿辦現已一律肅清辦理尙爲妥速所有在事
出力之徐州鎮總兵劉青煦著賞給頭品頂戴壽春鎮總兵郭寶昌歸德鎮總兵武朝聘均著賞給白玉
翎管一枝白玉搬指一箇白玉柄小刀一把大小荷包各一對徐州道桂嵩慶鳳鎮六泗道調補蘇松太
道李光久均著交部從優議敘署龍山游擊何師程本營失陷雖有應得之咎惟據報先期公出繼復隨
營力解城圍又擒獲匪首劉疙瘡尙知愧奮加恩著以參將用陣亡之千總李德才外委吳玉楷勇目邵
廷傑李燕降又圩長張德馨六品軍功李維楷均著交部分別從優議卹其防禦不力之署龍山左軍守
備李鴻標著卽行革職所有被災地方著該督撫等妥爲撫卹毋任失所餘著照所議辦理該部知道○
丁亥賜練軍新隊營名曰虎神○以湖北候補知縣魏遠猷專擅任性革職永不敘用交地方官嚴加管

東張之洞原參疏漏交部議處○以山東楊莊大堤合龍予原參之曹州府知府邵承照等開復河南候補道馬開玉等優敘升補有差○以山東學政姚丙然跡近漁利紊亂舊章革職永不敘用○諭京師前曾舉辦十家門牌間閭安謐盜賊潛蹤立法甚屬妥協現在通飭各省一律辦理保甲京城地面亦宜興辦著派載瀚廣忠清銳溥頤趙舒翹李殿林徐承煜鈞寶華會同步軍統領衙門順天府五城卽行查明內外居民客商按照十家戶口安定保甲章程隨時嚴密稽查以期安良除莠該大臣等務當實事求是毋避嫌怨俟奏定章程後每年分爲兩次奏報俾免日久廢弛○諭張之洞奏遵旨裁汰冗員一摺前因各省仕途冗雜諭令該督撫嚴加甄別茲據張之洞奏稱查明歷年奉差不銷久假不歸自行離省回籍者咨明吏部不准再行到省又查有在本省候補而與例不甚相合多有違礙者暫停補署差委等語候補人員過多奔競鑽營最爲吏治之累該督所奏甚得綜核名實之要著各督撫一體查照辦理以杜冗濫而清仕途該部知道○戊子祭社 穆增道督祺恭代行禮○己丑以奎斌爲宗人府右宗丞○派榮祿爲閱兵大臣○以榮祿爲正藍旗滿洲都統剛毅爲內大臣○以那彥圖爲總理行營事務大臣○以載瀛爲十五營射大臣○以北洋武毅軍訓練有效予提督聶士成交部優敘○諭甘肅提督董福祥調紮近畿訓練隊伍具有條理從前征剿回匪戰功卓著著賞穿貂蟒褂以示優異○以安徽滴陽土

匪肅清乎兩江總督劉坤一安徽巡撫鄧華熙河南巡撫裕長交部優敘○欽奉 慈禧端佑康頤昭豫莊誠壽恭欽獻崇熙皇太后懿旨國家設立行省特簡督撫大僚凡吏治之清濁民生之休戚惟賴公忠體國之臣張弛得宜有以挽頽風而臻上理近來督撫中實心任事者固不乏人而養尊處優但講排場者亦或未能盡免當茲時事多艱深宮宵旰焦勞無日不以治安爲念所願爲封疆大吏者力祛積習共任仔肩人才爲方今要務當勸接屬吏認真考核其賢者擇尤薦拔用資觀感中材以下量能使隨時勸勉不肖者應卽嚴行參劾毋稍瞻徇州縣爲親民之官必使官民相親毫無睽隔惟全才難得督撫之待州縣當仰體朝廷任官之意如父兄師長之訓教子弟俾之成材自督撫不以吏事爲心州縣因不以民事爲心以致劣稱稍更把持蒙蔽最爲吏治之蠹所宜掃去浮文講求實際使下情不致上壅上德得以下宣方不負爲民設官之意總之朝廷綜核名實職事寄之有司而表正視乎長吏督撫果能整躬率屬推保赤以保民視國事如家事振興鼓舞不難日起有功倘苟且宴安自矜威望素餐尸位罔恤民艱不能爲該督撫等寬其責也將此通諭知之○劉坤一奏 遵奉 諭旨在上海設立商務總局派委員紳經理並籌辦農工礦路各學情形已經奏明在案旋派在籍翰林院修撰張謇湖北補用道劉世珩等馳赴上海設局開辦選舉絲茶各業巨商嚴信厚等爲商務總董分飭所屬各舉分董考求地方物產所

宜貿易興衰之故廣勸紳富自行設廠製造土貨以冀挽回利權並令立商學以究原流蒐商律以資比
例設商會以聯心志撰商報以廣見聞數月以來商情頗形踴躍當茲物力艱絀未敢稍涉恢張惟當需
之以漸真之以恆由上海以東連燕齊南通閩粵與漢口商務局聯絡一氣日久可望振興至工藝立學
厥分兩門一曰化學工藝凡船械鎗礮汽雷礦路等學皆該局已飭上海製造局添設工藝學堂就欸經
營擇期開辦礦路學之初基與武備生所習相近亦由金陵陸師學堂挑選學生分齋課授其一曰機器
工藝綜括機工手工程效最捷可開民生衣食之源當兩商江蘇安徽江西三撫臣協力籌欸在金陵設
工藝大學堂三省各招學生數十名社堂肄業一俟擬定章程另行舉辦惟勸農設學固闕生計攸關體
飭各地方官詳諭紳民一體遵照無如農氓惟魯魯故安常驟語以耕植新法疑信參半且屢遭荒歉欲
項難籌官民力均未逮現由上海農學報館廣譯報章頒行各屬俾鄉里小民耳濡目染藉開風氣而昭
信從則農學可以徧設矣得 旨知道了著即督飭在事各員認真舉辦以收實效○庚寅張之洞奏承
准總理各國事務衙門電咨上年八月二十一日奉 旨湖南省城新設南學會保衛局等名目跡近植
黨應即一併裁撤會中所有學約界說札記答問等書一律銷毀以絕根株著張之洞迅即遵照辦理欽
此遵即飭據湖南藩臬兩司將南學會保衛局即日裁撤當經電奉在案臣仍一面飭將學約界說札記

答問等書版片全數查調來鄂一律銷毀至保衛局之設飭兩司切實查覆經升任湖南撫臣俞廉三前在布政使任內曾同署按察使夏獻銘詳稱前署臬司黃遵憲以原設保甲局員紳懈弛因參酌各通商馬頭捕房條規添設大小各分局派委員紳設立巡捕吏名保衛擬定章程均以緝捕盜賊清查戶口爲主其附於保衛局之巡警所凡失業流民犯有賭竊等事卽收入所內看管延請工匠教習手藝令其改過自新藝成限滿察看保釋與他省之自新所章程相同惟湘省民情不免驚疑會議頗多追試辦數月城廂內外晝夜有人梭巡凡宵小之徒皆爲斂跡塵市一清商民翕然安之惟與保甲名異實同官屬多立名目設局太多經費過鉅勸令民捐力有未逮現擬裁歸保甲局撥卽用款核實辦理等情詳請核辦前來臣復於湘省來鄂官紳詳加詢考據稱保衛局係變保甲之名而行保甲之實頗有成效尙無抽釐情事等語查保衛局既係辦理保甲局務其兼辦巡警習藝教養難民亦地方應辦之事原不必另立保衛之名且辦事期在核實亦不必故示奇異自應仍用舊日保甲局名而力掃濫支敷衍之積習現在迭次欽奉諭旨整頓保甲臣已嚴飭該司將所有局章參考民情斟酌妥善酌減捐數督飭員紳認真巡緝務期事有實效款不虛糜以仰副朝廷綏靜閭閻之至意得旨知道了卽著嚴飭湖南保甲局認真辦理毋得有名無實○俞廉三奏查銷砂種外洋糖爲安的摩尼其價在金石之間湘省各屬所

在多有苗路錯碎不成片段小僅顆粒鉅則萬斤或一綫相連其山各處採煉可作炸藥帽藥字模並入鐵鑄造機器其用甚廣其價較鉛爲昂爲外洋所必需爲中國所創獲論礦務者咸以此爲司興之利前於益陽等處覓獲錫砂試鑄銷路有漢口亨達利洋行訂銷出錫五成以上之砂三萬墩每墩先交價銀三十兩俟其售出仍照行規各分紅成因於漢口設立轉運局過磅交易計所定墩價若全數交收不第前虧可補惜現產無幾未可期以歲時復於各處廣爲搜求續有所獲而砂質較低招粵商卡成公司來湘就近提煉成錫分別運銷查接境產錫之所則有貴州之銅仁四川之秀山銅仁近構封閉秀山所產去年曾販運過界經辰州分局查獲照本省商探章程給價入官未令越境蓋以此物爲火器所用無異硝磺未可聽其所之漫無限制且私販爭售價值必減有妨利權倘本省商探之區從而影射稽考尤難更恐鄰近所產尙不止此應請 敕下礦務鐵路總局定立嚴禁私販錫砂條規分行各省一體查禁其黔省各省嗣有運錫過湘者卽由湘照商探章程予以官收價值不得違越以杜弊端得 旨著總理衙門會同督辦礦務大臣查核辦理○總理各國事務衙門等奏光緒二十五年正月二十二日准軍機處鈔交北洋大臣裕祿奏漠河礦局新章提餉過多入不敷出請酌量變通以維大局一摺奉 硃批該衙門議奏欽此臣等查原奏內稱漠河開礦之始原定章程先將局廠各項費用開銷所得餘利作爲二十

成以六成報充軍餉以四成分給員司花紅以十成派給股商利息嗣於光緒二十二年間經查辦事件大臣延茂改定新章漠河金廠所得金沙餘利先提六成作為軍餉下餘四成作為局用股利觀音山金廠所得金沙餘利先提八成作為軍餉下餘二成作為局用奏明在案茲據督辦漠河等處礦務道員徐傑稟稱漠河孤懸絕塞百物騰貴初開辦時每年用款十三四萬兩嗣因續開觀音山廠增至十五六萬兩二十一二三等年漸增至三十餘萬兩現經極力裁汰統計一切局用每年實約需銀十七八萬兩無可再省若再加裁減不惟無以安任事者之心而食用各項亦恐僂焉難繼至入款全賴金沙金苗之旺衰無常即入款之盈絀難定自光緒十五年至二十年每年得金均不過二萬餘兩或一萬餘兩十九年尙不及一萬兩惟二十一年得金五萬兩零然亦僅此一年迨二十二年仍僅二萬餘兩至二十四年尤為減色以入款與出款相衡不敷顯然查二十一年以前每年均能結有餘利者實緣釐定章程先除各項開銷然後將餘利作為二十成內提充軍餉六成股商餘利十成員司花紅四成彼時糧貨價值亦尙平賤故能不形支絀無如已開各廠漸次消乏急切難得新苗加以年來各處歛收食物昂貴出款必不可少入款難望其增侵尋虧耗拮据萬分推原其故當奏改新章時但見二十一年出金之旺餘利之多以為必不至於虧累殊不知淘沙取金多寡原無一定況漠礦之開兼為防邊非盡言利前人幾費經營

幸著成效中國言礦務者首屈一指自改新章 國家得餉稍多亦僅一時之利而非久遠之謀此後局用愈窘措手尤難既不能枵腹從公又不能點金爲用智窮力竭勢必停辦而後已礦務停則軍餉無所出邊防亦覺空虛漠礦本係招集商股而辦礦尤資人力必有股利花紅始足振興商務驅策羣力新章專以漠廠糧食餘利作爲股利花紅無論貨利未必可靠即使有利而局用尙難彌補更何股利花紅之有無股利則股商缺望商務有礙無花紅則人心解體誰共國存體察情形實於礦務盛衰大有關係擬請將新章酌量變通每年所得餘利除開銷一切局用外結存若干再按十成計算觀音山仍以八成充餉漠河仍以六成充餉下餘觀廠二成漠廠四成作爲股商餘利員司花紅似此辦法較之現行新章軍餉少得有限而視舊章仍不啻加倍且局用股利花紅均有所出礦務賴以維持不至終於墮廢等情前來查漠河金礦開辦至今興利實邊業經著有成效而應加意維持俾免墮廢新章以最近之年爲衡提餉過多入不敷出虧累勢所必然該道擬改章程係爲因時補救起見與其因循墮廢軍餉無著何如酌量變通可期經久仰懇 恩准照擬辦理等語臣等查漠河金礦爲中國礦務發軔之初興利實邊固十餘年經營匪易現以新章提餉過多以致入不敷出難乎爲繼自應極力維持以期經久現經北洋大臣裕祿揆時度勢請予變通自應請 旨准如所擬辦理以保國課而恤商艱得 旨如所議行○辛卯祭

文昌帝君廟遺簿靜恭代行禮○奎俊奏川省本年循照奏案將制兵裁去一成現存之兵不敷分布兼值地方多事尤恐已裁之兵滋生事端擬請暫緩裁汰得旨著照所請仍將練兵事宜認真籌辦毋蹈因循故習○壬辰張之洞奏擬團保並行的籌有益無弊辦法大要約有八條一曰保甲爲本查保甲之法乃安民誥奸之善政行之自古十年以前前任督撫臣履經遵旨通飭遵辦定有詳細章程惟各州縣應辦之事如錢糧詞訟緝捕堤工等類非一端其於保甲事宜未能專心以注且必須經費必須隨時按戶清查又防衛各地保藉此虞民以故據稟報則舉行者實效則殊少大率省會較易州縣較難武昌省城及漢陽府漢口鎮三處籌有專局派有多員稽核尙屬認真沙市宜昌保甲已未見有實效至此外各府州縣則疏密勤惰常無一定惟視州縣何如此時欲加整頓似無須另定章程惟有嚴飭查照章程實力舉行考其成效具盜案易破竊案稀少會匪不能萌芽者卽是保甲認真之功若盜賊滋多會匪竊發者卽是保甲廢弛之咎以此考課較爲有實濟而無紛擾二曰官督紳團城內有官弁兵役只辦保甲毋庸團練且城鄉人多油滑團亦無用每縣四鄉酌分數團每團設正副團首各一人以端正殷實讀書有功名者充之每五十人設一練長以通習武事安靜樸實者充之由該鄉公舉地方官選定札委統歸地方官管束不准以劣紳豪霸濫充亦毋庸以大紳充當以杜一縣數官恃符撓法之弊

專管查奸禦匪等事不准干預地方詞訟事件練丁有犯只可送官究治不准私設公堂擅自刑責卽盜匪亦不准私刑拷訊至湖北各縣多有堤工向有本地公舉紳董經理此項團首不准強攬堤垸工程亦不准率團尋仇械鬪違者黜革嚴辦三曰量力練丁擬令大縣練團丁三百名中縣二百名小縣一百名最狹小瘠苦之州縣免練以全省六十八州縣計之除最苦十餘縣外可共練團丁一萬餘人四鄉分練數十村合爲一團其團丁擇係本籍年在二十四以下身材健壯性情樸實無過犯者充之其城內油滑游民家居脚夫水手無業乞丐概不准充造冊詳載年貌親屬執業送官點驗不合格者另選其什伍部勒略仿營制一縣團丁或分爲三五隊或分爲兩三隊由該官紳體查情形酌辦每三日在本鄉操練一次每一月團首校閱一次每三個月通縣各團訂地合操一次由地方官考閱正臘三伏農忙免操四曰自籌經費團丁平日不給口糧操練日酌給飯銀其願自備口糧在團練公所領用器械操練者聽團首校閱日地方官合操日酌給獎賞所需器械惟刀矛自備其鎗礮彈藥稟官備價赴省領給操畢卽存儲團首公所不准私帶回家所有操練飯食獎賞鎗礮器械旗幟號衣聘募教習一切雜項之費俱由紳民自籌照官批定辦理官固操日於該團自備飯食盤費外由官自行的給獎賞五曰清查會匪近來各州縣會匪甚多到處開立山堂散放飄布句人入會謀爲不軌或成團首等認真稽查查獲送官究辦惟須

確有證據不得妄拿無辜其形跡可疑者卽行驅逐出境並隨時曉諭本團本保居民不可入會如有誤
買緝布者責令繳贖彙送地方官其窩藏盜賊之戶一體確查舉報六曰清鄉教案近日湖北風氣動輒
造謠聚眾攻毀教堂擬查照總理衙門議准左都御史裕德條奏通行章程責成團保紳董每日於團丁
牌長中擇派妥慎者三五人輪流在於教堂附近巡查遇有爭端立即解散教士出外游歷亦由該團丁
牌長妥爲防護並責令團首保董將 諭旨中外和睦之大義及傳教說書送診育嬰等事均係 朝廷
准行之條約諸傳教堂荒誕殘忍之謬說隨時詳細講說務使窮鄉僻壤家喻戶曉民教相安不生枝節
免致擾及良善上累 國家如該紳等保護得力卽查照奏案分別尋常勞績請獎如防護不力甚至煽
眾鬧教核其案內情節查照奏案懲處七曰團保相輔一縣團丁有限團首無多所有大小鄉村一律查
清保甲每村設立保董一人擇其端謹有身家有體面者充之刁健地痞不准濫充專管編核戶口稽察
匪黨查禁窩戶勸導愚民等事地方官亦以禮相待其尋常催徵勾攝公事仍用向設之保正辦理其一
村不滿三十家者附入鄰近之保董經管於本村要隘高處設一瞭望更棚若一村盜匪竊發立即放鎗
鳴鑼或就寺廟鳴鑼遠近遞傳各村保甲合力四面截拿團首練長等卽率團丁追擊以期必獲八曰酌
定勸懲此次紳富如有能欽遵 諭旨捐助團練經費者地方官稟明奏請獎敘銀數較少不敷請獎者

由該地方官酌給花紅匾額如辦團獲匪確有成效者擬請將團首奏請獎給虛銜封典其次由督撫酌給功牌頂戴該州縣辦團得力者酌給外獎如團首保董斂費滋弊生事擾民縱容匪徒亦即分別懲儆地方官辦團不力保甲廢弛者隨時懲處總之團練一事其力只能戢內匪若責以械猛藝精折衝禦侮則臣實不敢爲此鋪張欺飾之辭若團保相輔資以清會匪弭教案則尙是力所能爲當飭令各就本地情形分別迅速舉辦縱未能周密盡善亦必須辦有規模保甲勒限兩箇月稟報團練勒限四箇月稟報果能內匪不作外讐不生其益處已非淺鮮惟有切飭該道府督率舉辦隨時考核日久勿懈庶可期民安匪戢仰慰 慈懷至漁團一節湖北外江內湖雖有漁划散漁疍客擇便覓食往來無定每一划或一兩人或四五人老弱婦女卽在其中興沿海之大幫巨艇者不同礙難練成漁團致滋紛擾惟有責成水師及團保隨時酌量妥爲稽查以杜盜匪潛匿之弊得 旨知道了所擬章程尙屬妥協卽著認真辦理毋得日久又成具文○癸巳以兼管順天府尹孫家鼐前署府尹陳東和於奉 旨飭查之件並未詳細確查率行具奏均交部議處○許應騷奏閩省全境皆山惟福州及興泉三府間有平地每段祇一二十里而止餘則灘磯居多歷來種穀者半藉山麓之梯田種薯者兼及嶼旁之沙地民數艱食端由於此其峯腰嶺脊不堪阡陌之處或種竹種茶種木屢年曾試植桑及棉花迄未收效且植桑棉之地卽植

草木之地損彼益此利富無多也今之育農工欲主用外洋器具不知機械靈捷原以補人力所不足必西北平原墾勸而百數十頃者始展所長若閩人浮於土地利已搜剔殆盡則用之非便豈惟有切飭各屬認真振興水利開墾荒田並曉諭民間講求樹藝新法以阜物產而增財賦福建工藝通西洋最早器器船政設局歷數十平比攻全攻未嘗不工雖洋匠董其成實華人分其事平日耳濡目染讀汽學電學者頗不乏人祇因自置一機而取值不貲獨創一器則曠日持久是以不求精進現將給照專利章程頒行勸諭冀其互相激勵自發其興又閩之漆工製造日精其細緻光澤可駕東洋而上近泰西諸國販運出口者頗多仍當極力提倡以期逐漸推廣至於商務以茶木為大宗木祇行銷於內地茶則專售於外國從前印度日本未請種法閩之業茶者獲利甚豐今則洋茶盛行銷路減去十分之六七推原其故固由種植精製未盡如法亦因稅釐耗及徵款實繁以致成本增重動形虧折茶業繫閩民之生計實閩中國之利權若不設法挽回深恐日做一日當詳慎酌擬再行奏明辦理此外開礦築路皆當務之急然設一公司必須百數十萬鉅資閩屬瘠區較他省尤難招集素聞南洋一帶閩民流寓者甚眾類皆富於財產工於習遷平日感 皇朝德澤思故鄉風土非不樂於邇返特因回里者多被官紳魚肉遂致裹足不前直接見在籍各紳諄勸其剴切馳函廣為招致並擬仿周官保富之法以示優待將來摘肯源源

歸國則藉其財力固可助興作之需出其心思尤足開風氣之始創辦一切較爲易力也得 旨知道了
卽因地制宜切實舉辦勿徒以一奏塞責○劉坤一奏光緒二十四年十二月二十六日承准軍機大
臣字寄奉 上諭有人奏江南通州劉海沙地與常熟江陰毗連近時哥老會紅幫糧幫所窟宅有船有
械沿江鄉民皆受其害等語著劉坤一體察情形酌調勇營駐紮其地並飭通州常熟江陰各州縣曉諭
紳耆力行保甲以清匪黨而固江防等因欽此伏查劉海沙孤懸江心周圍一百餘里爲通州及江陰常
熟兩縣所分轄港門多處匪徒最易潛蹤前因訪聞有紅糧幫匪盤踞希圖滋事節經分飭查拿並派撥
水師船隻暨狼山鎮標練勇百名前往駐巡在案茲復欽奉 諭旨飭令該營駐防邊卽札飭統領合字
旗章其倭就近速撥一旗前往該沙會同地方文武督飭兵捕密探各匪蹤跡所在無分畛域合力兜拿
務獲懲辦一面嚴飭各該州縣將保甲事宜認真舉辦總期奸宄無從託足閭閻藉以乂安以仰副 聖
主戡暴安良之至意得 旨知道了卽著督飭認真巡防以靖奸宄毋得日久生懈○甲午祭 關聖帝
君廟遣訓導恭代行禮○以安徽學政徐致祥捐助太和渦陽縣賑交部議敘○乙未盛京將軍依克唐
阿奉賜卹如將軍軍營病故例戰功事蹟交國史館立傳立功省分建祠並予諡○以裕長署理盛京將
軍○乙未諭御史韓培森奏保舉冒濫請飭遵照向來辦理章程照例嚴核一摺著吏部辨明例引妥議

具奏○丁酉以新建陸軍訓練有效予候補侍郎袁世凱交部優敘○命載勛管理雍和宮事務督祺管理武英殿事務○廖壽豐奏浙省仿照粵鄂銀元章程擇省城報國寺前空曠地建造局廠一面訂購德國鑄造大小銀元機器全付併延僱熟諳洋匠分別指授現在局廠工竣購到機器一律裝配齊全遴選向來辦事勤慎廉潔自愛各員常用駐局分任其事仍選派知府一員爲該局坐辦由藩司會同防軍局督率稽查以總其成擬即擇日開鑄共鑄大小銀元五種核准成色分兩不得絲毫出入錢面繫以浙江省造字樣所需鑄木由防軍局借撥即以鑄出銀元採買寶紋循環周轉其局廠機器經費共用銀六萬餘兩業於鼓鑄成本款內動支應請作正開銷得旨即著移交劉樹堂認真辦理仍將各種銀元先行呈覽○廖壽豐奏今日切要之圖以練兵爲第一要義再四熟籌除上年奏明由提臣陳濟清將甯波鎮海各營改練洋操逐漸推廣省城設立武備學堂陸續挑補訓練外擬再仿江南自強軍湖北護軍新營章程裁撤湘軍雲字前旗楚軍親兵新前旗兩旗就中挑選精壯先練步隊三哨礮隊一哨其哨官排長由自強軍調取及本省學堂學成者選充一律改用德國陸操教以進退步伐分合包抄各種陣勢演習打靶挖溝築壘及攻守火繩鎗礮表尺測量諸法仍兼習義勇刀牌各技名曰武備新軍派委防軍局提調候補知府朱成鳳爲營務處隨時督率稽查按月親詣操場點名放餉不准一名缺額不准一日

曠操計步隊三哨礮隊一哨共勇丁三百六十名管帶官一員每哨各設哨官排長等併計員弁薪工勇糧及外加冬夏操衣靴帽月共需銀二千二百餘兩視江南自強軍爲減與鄂省洋操章程相仿營務處現以局員兼充暫不開支薪水並暫時不設副哨官均因籌款爲艱力從節省實計月餉銀二千一百餘兩以所裁兩旗糧餉抵支僅足敷用將來如遇徵調應請臨時酌增是爲新軍礮隊營擬尙續裁二旗挑練馬隊工程隊合成二營練熟之後將省外未改練各營旗輪替抽調汰弱留強換防操練似此撥節變通兵不另募餉不加增而標練防勇各營一律可成勁旅臣交替在即前項礮步隊營業經臣挑練成軍由該營務處督同逐日訓練其馬隊工程隊等項挑練事宜應俟新任撫臣劉樹堂體察情形酌度辦理得旨卽著移交劉樹堂分別認真辦理○戊戌先是山東沂州民教小衅案已辦結德人索懲罪首遣兵徑踞沂州至是命開缺巡撫張汝梅派兵前往辦理尋新任巡撫毓賢主格遵 朝旨持之益力德兵乃退○諭宗人府奏遵嚴處分一摺貝子毓櫛奉恩鎮國公全榮守護 陵寢理宜敬慎乃竟毫無整頓於家丁屬員弊混各節亦未覺察均屬有負委任該衙門僅擬罰銀半俸抵過降調處分殊屬不足懲辜固山貝子毓櫛著實罰本俸全俸九年奉恩鎮國公全榮著實罰本俸全俸三年以示懲儆○癸卯以袁昶爲光祿寺卿○譚鍾麟鹿傳霖奏 臣等於上年十二月十七日欽奉十一月十九日 諭旨沿江沿

海各將軍督撫籌辦漁團現在情形究竟若何著於奉到此次諭旨後查明如已辦有端倪卽行據實覆奏若尙未一律舉辦應尅日籌定章程勒限辦理等因欽此轉行欽遵在案查各省沿海漁船向應編冊給照稽查出入自海禁開而舊章漸廢前大學士左宗棠督兩江時曾創設漁團廣東前辦海防亦曾舉行漁團保甲旋作旋輟迄無成效推原其故蓋漁海窮民捕漁爲業一日不舉網卽懸釜填廬非若內地市鎮鄉村舉辦團練可使貧者出力富者出錢也亦有刁徒假公營私漁長藉端牟利衛民適以擾民臣等悉心商酌惟有明定章程先辦水保甲不妨其生業則漁民易從俟一律編查完竣再行查度情形講求實際得 旨知道了卽著照擬定章程先行試辦務求實際毋託空言單併發○乙巳張曾畝奏撥捐爲進款大宗乃各卡自委員以及人役皆倚爲婪財致富之資雖比較稽察立法最嚴而弊端迄未能絕竊謂剔除之道立法不如用人果能委任廉勤自可廢杜中飽而又信賞必罰獎廉懲貪不爲一切賄徇調劑之計如此則稅課增再捐納職官一事不能遽停者徒以度支未充耳欲停捐輸必須先籌抵款各省著名優缺各關道府盈餘猶復不少若令各該督撫澈底清查仿照已故奉天將軍依克唐阿之於東邊道前兩廣總督張之洞之於肇慶府黃江廩前山東巡撫李秉衡之於臨清關東海關各辦法俱以實徵之數報解仍請寬免既往厚給公費則化私爲公鉅款可集各省多請開設鎔銀圓等廠似應通盤

籌算擇一二精善之廠令其儘力鑄造以供各省之需各省按價定購以助其費蓋設廠太多費用必鉅鎗彈則各廠異式銀圓則成色不同若歸併一經費可省所擬各節似足抵收捐之數若猶不足亦所短無幾各省既紛紛請停分發若著派各省籌補不足宜所樂從如此則抵款有著捐納可停 上諭軍機大臣等張曾敝奏請飭各省整頓釐金並片奏請停捐輸先籌抵款暨覈實徵收關稅並將鎗礮銀圓等廠歸併一以節經費各等語著戶部妥議具奏著戶部奏徵收釐金必須經理得人始可下順商情上增 國課光緒二十三年六月間 戶部請令各省整頓釐金摺內奏稱欲防偷漏在乎扼要設卡嚴密梭巡欲杜中飽在乎崇廉抑貪收報核實欲禁寬放在乎信賞重罰分別懲勸而其要總以委任得人爲切實關鍵並聲明將來各省釐金如較二十二兩年收數大有加增准其將廉幹之員從優獎勵如收數稍有虧短則將尤爲貪劣者撤委嚴參等因奉准通行在案今臬司張曾敝奏稱立法不如用人信賞必罰獎廉懲貪各節與 戶部前奏大致相同應令各省查照 戶部奏案暨該臬司此次所奏認真辦理毋致瞻徇以冀釐金日有起色又原奏請停捐輸先籌抵款一節查慎重名器肅清仕途自以停止捐輸爲不易之論而用款浩繁度支奇絀又以接辦捐輸爲濟急之謀現行新海防事例前後將及十年雖已漸成勢未然就一年計之部庫及各省收數尙不下一百餘萬於餉需不爲無裨今該臬司所稟籌抵各款

如優缺各關道府其盈餘究能提解若干鎗礮銀圓各廠歸併畫一其經費究能節省若干殊難預計若遽將捐輸停止無論部所盈形拮据卽北洋疆土成一軍專恃捐款爲命服者勢必立時告匱貽誤堪虞此臣部所以於捐輸一事不敢遽議停止也惟該臬司擬令各省著名優缺俱以實徵之數報解俾得化私爲公鎗礮銀圓等廠歸併畫一俾經費得以節省均屬籌款之法自可酌議施行應請 旨飭下各省將軍督撫按照該臬司所奏各節將該省各項優缺酌提盈餘歸公其鎗礮銀圓等廠或就本省歸併或與外省歸併均應破除情面力戒浮靡設法妥爲籌辦仍將實在提解盈餘及撙節經費若干專案奏咨報部屆時由臣部通盤核算如籌出各款足與收捐之數相抵卽將捐輸一事斟酌情形奏請停辦此時應請暫緩置議得 旨如所議行○是月英吉利國使臣寶訥樂回國由參贊代理○義大利國使臣馬迪訥回國由英吉利國使臣兼理